

FRANCONIS BURGERSDICI

IDEA

PHILOSOPHIÆ

NATURALIS,

SIVE

Methodus definitionum & contro-  
versiarum Physicarum.

*Editio novissima.*



LVGD. BATAVOR.

Ex Officinâ Elzeviriorum.

---

CLC I3C L11.



*Amplissimis, Prudentissimisq; viris,*  
D. D. P R Æ T O R I,  
Consulibus & Syndico Civitatis  
Delfensis.

*Amplissimi, Prudentissimique Viri;*

**C**UM primum ex studiis meis  
aliquem sperarem fructum,  
etiam publico profuturum,  
simul apud animum constituebam,  
vobis offerre, quicquid esset, quod à  
me primum exiret in lucem. Multæ  
me & graves causæ moverunt. Ve-  
stris me subditum legibus nascendi  
forte, vestrum fecistis multis & ma-  
ximis beneficiis, & omnia mea, ve-  
stra. Vix studiorum cursum inchoâ-  
ram, vos me favore, consilio, & re,  
juvistis singularem in modum. In  
Galliam vestris auspiciis euntem, ut  
gentis illius linguam & mores ad-  
discerem, & simul in eruditione &  
prudentiâ proficerem, gravi atque  
honorificâ commendatione muni-  
vistis,

vistis, ut in Academiâ Salmurienſi  
vix figenti pedem, nondum bene  
noto, Philoſophiæ profeſſio com-  
miſſa ſit ab Illuſtri Viro, D. Philip-  
po Mornæo Pleſſiaci Marliani Do-  
mino, & Ampliſſimo illius Acade-  
miæ Senatu, ſolo veſtræ commenda-  
tionis pondere & autoritate motis.  
In illâ urbe & Academiâ quinquen-  
nium ſubſtiti; quamdiu ſcilicet in  
turbante patriâ ſpes non eſſet pu-  
blicæ vocationis. Interea colebam  
Philoſophiæ ſtudium cum Theolo-  
giâ conjunctum, ut in patriam rever-  
ſus, vel Academiæ poſſem, quod in-  
primis optabam, vel Eccleſiæ, ſi il-  
lud non ſuccederet, cum aliquo fru-  
ctu inſervire. Res cecidit ex voto,  
ſed non ſine veſtrâ operâ, quid com-  
mendatio, publico civitatis veſtræ  
nomine, apud Nobiliſſimos & Am-  
pliſſimos hujus Academiæ Curato-  
res habuerit momenti. Hæc ego be-  
neſicia tanta eſſe judicavi, ut, cùm  
de referendâ gratiâ deſperarem, in  
animum

animum induxerim, eorum magnitudinem agnoscendo, & prædicando, ingratitude me crimine liberare. Quamobrem, cùm hisce diebus in gratiam quorundam adolescentium, quos in Physicis privatim erudiendos susceperam, *Ideam Naturalis Philosophia* typis mandarem, voti mei memor, judicavi, hunc qualemcumque meum laborem vestro nomini inscribendum esse, ut publicum extaret monumentum meæ erga vos gratitudinis. Vos studiis meis, crudis adhuc, imò in herbis, favistis; suscipite primitias eorum benevolo & favente animo: nec tam muneris tenuitatem, quàm animum spectate vestrarum A. A. studiosissimum. Deus vobis, ac vestræ civitati, quàm diutissimè bene esse patiatur. Lugd. Batav. IV. Idus Decemb. MDCXXII.

V. V. A. A. *addictissimus*

FRANCO BURGERSDICIUS.

A 3 Philo-

## Philosophiæ Studiofis.

**I** Deam Philosophiæ Naturalis ante trien-  
nium eo fine edideram, ut sciretis, quem  
ordinem sequeremini in discendâ hac nobi-  
lissimâ ac diffusissimâ parte Philosophiæ: &  
simul, ut ii haberent perpetuas theses, de  
quibus disputarent, qui privatim mea ute-  
rentur institutione. Hac de causâ Autores  
citavi, non antiquos illos Græcos, Arabes,  
& Latinos interpretes, Aphrodiseum, Am-  
monium, Philoponum, Simplicium, The-  
mistium, Avicennam, Averroëem, Boë-  
thium, Thomam, &c. qui auctoritatem  
habent ab antiquitate; sed Doctores Co-  
nimbricenses, Zabarellam, Pereriam, To-  
letum, aliosque novos scriptores, ex quibus  
ducere soletis prima lineamenta Philoso-  
phiæ. Diffusa sunt horum autorum com-  
mentaria, & ferè sine methodo: ut quibus  
propositum est, Aristotele obiter illustrato,  
quidlibet ad illius textum in controversiam  
adducere. Ex his selegi disputationes, quæ  
ad Physicam spectant, easque eâ methodo  
disposui, quam sum arbitratus cum natura  
hujus

*hujus scientia optimè congruere, intertextis  
subinde definitionibus, iisque potissimum  
Aristotelis, ubi id ratio methodi require-  
bat. Nec dubito, quin si Philosophia stu-  
diosi, definitiones & controversias Physicas  
hac methodo examinaverint, magnum fa-  
cturi sint suorum studiorum compendium.  
Vtilissima enim res in studiis est ordo, &  
ad eas accuratè discendas, & ad easdem  
fideliter retinendas. Et sicuti ordinatorum  
studiorum fructus est solida eruditio; ita  
vix superficie tenus erudiri possunt, qui sine  
scopo ac methodo student, quasi*

*Sequentur corvos testâq; lutoque.  
Quoniam autem non ingratum vobis hunc  
aliosque meos labores esse cognovi, cum Ty-  
pographus novam editionem adornaret,  
obiter hanc Ideam emendavi. His meis  
laboribus tantisper fruimini, dum per occu-  
pationes meas liceat Physicam, aliasque  
Philosophia partes, plenioribus institutio-  
nibus illustrare.*

I D E A  
P H I L O S O P H I Æ  
N A T U R A L I S,

*sive*

Methodus definitionum & contro-  
versiarum Physicarum.

---

DISPUTATIO I.

*De Philosophia & Physices natura.*

T H E S I S I.

**P**hilosophia, si nomen spectes, nihil aliud sonat, quàm φιλία ἢ σοφίας, hoc est, amor & studium sapientia. Si rem ipsam consideres, nihil aliud est philosophia, quàm σοφία, si-  
ve sapientia: ut modestè magis, quam rectè, Pythagoras, humanam sapientiam, Philosophiam potiùs, quàm σοφίαν appel-  
landam censuerit.

2. Philosophia definiri potest, rerum di-  
vinarum & humanarum cognitio, quan-  
tam homo naturali intellectus lumine  
consequi potest.

3. Stoici Philosophiã dividunt, in Natu-  
ralem, Moralem, & Rationalẽ, ut autor est  
Dio-



Diogenes Laërtius in vitâ Zenonis. Verum præstat cum Peripateticis Philosophiam in duas partes dividere, in Speculativam & Practicam. *Arist. 1. Metaph. cap. 1. Con. proæm. Phys. Perer. lib. 1. cap. 2.*

4. Etenim omnia in Philosophia sunt gemina, subjectum, objectum, finis. Philosophia speculativa residet in intellectu speculativo, versaturque circa res *divinas*, hoc est, necessarias, idque solius veritatis gratiâ; Philosophia practica hæret in intellectu practico, versaturque circa res *humanas*, hoc est, contingentes, & nostro arbitrio subjectas, idque non nudæ cognitionis, sed praxeos cognitionem sequuturæ gratiâ. *Perer. lib. 1. cap. 3.*

5. Hinc sequitur, Logicam non esse partem Philosophiæ, ut quæ non cognitionem rerum, sed modum res cognoscendi, suppeditat.

6. Philosophia speculativa non est una scientia, sed compages trium scientiarum specie differentium. *Con. proæm. Ph. quæst. 1. Per. l. 1. c. 8. Suar. tom. 1. disp. 1. sect. 2.*

7. Scientiarum unitas, & distinctio, pendet ab unitate & distinctione objecti formalis, five à modo objectum considerandi. Modus considerandi, sumitur ab abstractione rei considerandæ à materiâ. Abstractio à materiâ fit

A 5            tribus

tribus modis. Res enim abstrahitur à materia singulari, vel à materiâ cōmuni, sed sola ratione; vel à materiâ singulari & cōmuni, non solâ ratione, sed etiam re ipsâ: illa Physicam, ista Mathematicam, hæc Metaphysicam constituit, *Conimb. procem. Phys. quæst. 1. art. 3. Perer. lib. 1. cap. 5. & seq.*

8. Metaphysica inter scientias speculativas ordine naturæ & dignitatis, prima est; Physica, secunda; Mathematica, postrema: secundum ordinem cognitionis nostræ, Mathematica prima est; Physica, secunda; Metaphysica, postrema. *Perer. lib. 1. cap. 17.*

9. Etsi non plane absurdum sit, plures scientias sub Metaphysicâ contineri, puta *scientiam entis* in genere, *Theologiam naturalem*, & *Angelographiam*: probabilius tamen esse existimo, has, partes esse unius scientiæ, quàm scientias specie diversas. *Perer. lib. 2. cap. 7. Suar. tom. 1. disp. 1. sect. 3.*

10. Mathematica continet sub se plures scientias specie diversas, Arithmeticam, Geometriam, Musicam, Opticam, Astronomiam, Geographiam, Staticam, &c. *Conimb. procem. Phys. quæst. 1. art. 3.*

11. Metaphysica reliquis quidem scientiis præest: reliquæ tamen scientiæ Metaphysicæ non subalternantur. *Suar. ibid. Perer. lib. 1. cap. 13. & 14.*

12. Phi-

12. Philosophia practica dividitur in partem communem, quæ Ethica dicitur; & partem specialem, quæ Politicam & Oeconomicam sub sese continet. *Picol. introd. ad x. grad. cap. 7. 8. & 9.*

13. Physica est scientia corporis naturalis, quatenus naturale.

14. Etsi corpora naturalia consistant in perpetuo fluxu ac mutatione, nihilominus tamen est Physica proprie dicta scientia. *Con. proæm. Phys. quæst. 2. Tol. ib. quæst. 1.*

15. Subjectum Physices ( quicquid alii disputant) rectissimè statuitur *corpus naturale* sive mobile. *Perer. lib. 2. cap. 1. & 2. Zab. de nat. scien. const. cap. 2. Dissentiunt Conimb. proæm. Phys. quæst. 4. Tol. ibid. quæst. 2*

## DISPUTATIO II.

*De Principiis corporis naturalis.*

## T H E S I S I.

**I**N unaquâque scientiâ tria spectanda sunt, subjectum, principia, & affectiones: eaque vel in genere, vel in specie.

2. Hinc factum est, ut Physica distributa sit in duas partes, in partem scilicet communem, in quâ agitur de corpore naturali ejus-

ejusque affectionibus in genere, & in partem propriam, in qua differitur de speciebus corporis naturalis, ejusque principiis, & affectionibus.

3. Principia sunt, quæ nec ex se invicem sunt, neque ex aliis, & ex quibus sunt omnia. *Arist. lib. 1. Phys. cap. 5. vid. Conimb. ibid. quæst. 1.*

4. Principia corporis naturalis omnino tria sunt, duo contraria, forma & privatio, & commune contrariorum subjectum materia. *Arist. lib. 1. Phys. cap. 6. & 7. Conimb. ib. quæst. 1.*

5. Ex his, materia & forma, sunt principia per se; privatio, principium per accidens: materia & forma sunt principia generationis & constitutionis; privatio, generationis tantum.

6. Materia est primum subjectum, ex quo insito, corpus naturale per se, & non ex accidenti, generatur, & in quod ultimò resolvitur. *lib. 1. Phys. cap. 9.*

7. Materia non est corpus, neque per formam aliquam corporeitatis (ut Avicenna loquitur) neque per simplicem suam essentiam. *Suar. tom. 1. disp. 13. sect. 3. Per. l. 5. c. 16. & 17. Conimb. lib. 1. de gen. & cor. cap. 4. quæst. 20. Tolet. lib. 1. Phys. quæst. 13. Zabarella partem etiam priorem probat contra Avicennam*

*cennam lib. 2. de mat. primâ cap. 14. Alteram improbat eodem lib. cap. 17.*

8. Imò materia est pura putâ potentia in genere rerum naturalium; hoc est, expers est & capax omnium formarum Physicarum: at in genere substantiarum, actu est. Habet enim ex se essentiam & existentiam partialem & incompletam (quâ corpora naturalia conjuncta formæ constituit) & non à formâ. Hoc sensu rectè dixit Scotus, materiam ex se habere actum, ut ipse loquitur, *entitativum. Suar. Tom. 1. disp. 13. sect. 4. Tol. l. 1. phys. q. 11. Per. l. 5. c. 13. Contrâ sentiunt Conimb. lib. 1. phys. cap. 9. quest. 3. Zab. lib. 2. de mat. pr. cap. 1. & seq.*

9. Hinc sequitur, materiam non posse esse sine formâ. *Contrâ Conimb. libr. 1. Phys. cap. 9. quest. 6. Suar. 1. Tom. disp. 10. sect. 9.*

10. Potentia materiæ dividitur in generalem, & specialem; generalis dicitur, quâ respicit quamlibet formam indifferenter; specialis, quâ respicit hanc aut illam formam. Prior potentia materiæ essentialis est, posterior accidentalis. *Zab. lib. 1. de mat. pr. cap. 10. & seq. Perer. lib. 5. cap. 21. & 22. Tol. lib. 1. Phys. quest. 12.*

11. Appetitus, qui vulgo materiæ tribuitur, ab illius potentiâ non nisi ratione discrepat.

crepat. *Conimb. lib.1. Phys. cap.9. quæst.4. Tol. ibid. quæst.4.*

12. Materiæ coæva est quantitas interminata. *Perer. lib.5. cap.18. & seq. Zab. lib.2. de mat. pr. cap.6. & seq. Contrà sentit Tol. lib.1. Phys. quæst.13.*

13. Dari formas substantiales corporum naturalium, demonstrant *Conimb. lib.1. Phys. cap.9. quæst.9. Perer. lib.6. cap.2. Suar. tom.1. disp.15. sect.1.*

14. Forma est actus substantialis, unum per se cum materiâ constituens. *Conimb. l.1. Phys. cap.9. quæst.11.*

15. Formæ substantiales non sunt ante generationem in materiâ, neque secundum se totas, neque secundum aliquam sui partem, aut gradum; sed educuntur ex potentiâ materiæ. *Conimb. l.1. Phys. cap.9. quæst.12. Tol. ib. quæst.17. Suar. tom.1. disp.15. sect.2. Contrà sentit Scaliger exerc.6. sect.5. & seq.*

16. Forma dicitur λόγος ἡ εἰς ἑαυτὴν ὁλοκληρῶς: & per formam dicitur corpus esse id quod est, non quasi forma sit tota corporis essentia, sed quod sit præcipua pars essentiæ, quâ corpus constituitur in certâ specie. Quod enim homo sit, aut quòd sit corpus, tam materiæ debetur, quàm formæ: sed quòd sit homo, debetur soli formæ, *Con. l.1. Phys.*

*c. 9. quæst. 1. Contrà sentit Per. l. 6. c. 7. & seqq.*

17. Vna tantum est forma specifica in quolibet composito. Huic plures formas, etiam substantiales, subordinari in viventibus, saltem ut dispositiones quasdam, non est impossibile. *Zab. lib. de gen & int. c. 2. Contrà Conimb. lib. 1. de gen. & cor. cap. 4. quæst. 23. Suar. 1. tom. disp. 10. sect. 10.*

18. Privatio est absentia formæ, quæ debebat inesse. Cum enim privatio dicatur vel respectu formæ expellendæ, vel respectu formæ introducendæ; posteriori respectu privatio intelligenda est, cum inter principia generationis numeratur.

19. Privatio dicitur principium generationis, quia in generatione est terminus à quo. *Conimb. lib. 1. phys. t. 9. quæst. 8. Tol. ib. quæst. 19. Perer. lib. 5. cap. 22.*

### DISPUTATIO III.

#### *De Natura.*

#### T H E S I S I.

**E**X materiâ & formâ componitur corpus naturale, hoc est, corpus habens naturam.

2. Natura est principium & causa motus, & quietis, ejus, in quo est, primò, per se, &  
non

non per accidens. *Arist. lib. 2. Phys. cap. 1. Conimb. ibid. quæst. 2. Tol. ibid. quæst. 1. Perer. lib. 7. cap. 4. & 5.*

3. Natura est principium motus activum & passivum.

4. In quibus rebus, & quorum motuum, natura principium activum est, in iisdem rebus, & eorundem motuum, est etiam principium passivum; sed non vice versâ. Itaque motus non solum naturalis dicitur, qui à formâ rei mobilis, ut à causa efficiente, proficiscitur; sed etiam ad quem recipiendum materia aptè disposita est. Licet ergo formæ, peculiari prærogativâ, naturæ vocabulum tribuatur, non est tamen negandum, quin etiam materiæ tribuenda sit appellatio naturæ. *Conimb. 2. Ph. c. 1. quæst. 3. Tol. ibid. quæst. 2. Perer. lib. 7. cap. 17.*

5. Atque ita (licet statueretur cælum ab intelligentiis moveri) causa tamen nulla foret, cur ejus motus dici non possit naturalis. *Conimb. lib. 1. de cæl. cap. 2, quæst. 3, Tol. lib. 2. Phys. quæst. 3. Perer. lib. 7. cap. 6.*

6. Natura non est principium motus & quietis in eodem simul corpore, sed in diversis corporibus: principium motus, in iis quæ naturaliter moventur; quietis, in iis, quæ naturaliter quiescunt.

7. Intelligitur autem quies à motu naturali,



turali inter termino ad quem. quies in termino à quo violenta est, & contra naturam.

8. Natura semper agit propter finem. *Conimb. lib. 2. Phys. c. 9. quest. 1.*

9. Necessitas ergo rerum Physicarum, non soli materię, sed etiam fini adscribenda est.

10. Hęc finis necessitas, cum sit hypothetica, non tollit è natura *Casum* aut *Fortunam*. *Tol. l. 2. Ph. quest. 9. Perer. lib. 9. c. 1. & 2.*

11. Casus est causa per accidens eorum, quę raro contingunt, idque in iis omnibus, quę alicujus gratia suscipiuntur. *Arist. lib. 2. Phys. cap. 5.*

12. Fortuna est species casus, in iis que solum locum habet, quę agunt *en œcceptus*, cum casus etiam sit in iis, quę agunt ex necessitate naturę. *Arist. ibid.*

13. Monstra, hoc est, effecta naturalia, quę à recta & solita secundum speciem dispositione degenerant, casu fiunt. *Con. l. 2. Phys. cap. 9. quest. 9. Tol. ibid. quest. 13.*

14. Ars semper est operis ac motionis suę causa externa, in eoque à natura differt. Ideoque non potest opera naturalia moliri: sed tantum potest naturam determinare, ac dirigere, causas naturales materię prudenter accommodando. *Conimb. lib. 2. Phys. cap. 1. quest. 1.*

## DISPUTATIO IV.

## De Quantitate &amp; qualitate corporis naturalis.

## T H E S I S I.

**S**ic de principiis corporis ac mutationum naturalium in genere; sequuntur quædam corporis naturalis affectiones; quantitas, qualitas, locus & tempus.

2. Quantitas (continuum intelligo) est accidens, quo corpus naturale partem habet extra partem.

3. Quantitas, materiam; termini quantitatis, formam immediate consequuntur.

4. Quàm ergo necessarium est corpus ex materiâ & formâ constare, tam necessarium est, corpus naturale esse quantum atque extensum.

5. Omne corpus naturale quantitate finitum est: infinitum actu, nullum datur. *Conimb. lib. 3. Phys. cap. 8. quæst. 1. Tol. ib. quæst. 7. Perer. lib. 10. c. 7. & seq.* Nec dari potest, ne virtute quidem divinâ. *Conimb. dict. loc. quæst. 2. Perer. lib. 10. cap. 10. & 11.*

6. Actui infinitum dicitur, quod habet partes æquales uni certæ, quarum, si una post alteram sumatur, & eadem non repetatur, nunquam tot sumi possunt, quin aliquot semper sumendæ restent.

7. Quan-

7. Quantum non componitur ex indivisibilibus, sed ex partibus in infinitum divisibilibus. *Conimb. l. 6. Phys. cap. 2. quest. 2. Tol. ibid. quest. 1. Perer. lib. 10. cap. 13. & 14.*

8. Quantum, dicitur in infinitum divisibile, non quia secari potest in partes infinitas, sed quia non potest dividi in ea, quæ amplius non possunt dividi. Quomodo dicitur numerus in infinitum augeri posse.

9. Corpora heterogenea, qualia sunt ventia, requirunt quantitatem naturæ suæ convenientem, & certis limitibus definitam, ita ut eorum natura specifica conservari non possit sub quantitate quantumvis magnâ vel quantumvis parvâ. *Conimb. lib. 1. Phys. cap. 4. quest. 1. Tol. ibid. question. 9. Perer. lib. 10. cap. 23.*

10. Corpora homogenea, qualia sunt elementa, reliquaque fere corpora non ventia, non habent certum terminum magnitudinis à naturâ præscriptum: (in quo citati autores dictis locis consentiunt.) Et licet habeant terminum parvitatæ propter ambientium corporum repugnantiam, ex naturâ tamen sua determinatam parvitatem non requirunt. *Perer. cit. loco. contra Conimb & Tol.*

11. Qualitas, quæ inter affectiones corporis naturalis recensetur, nihil aliud est, quàm

quàm corporis naturalis facultas ad agendum aut patiendum, quod suę naturæ consentaneum est.

12. Estque vel manifesta, vel occulta; quorum illa per se incurrit in sensus; hæc, non nisi ex effectis deprehenditur. Huc referendæ sunt sympathiæ & antipathiæ rerū.

---

## DISPUTATIO V.

### De Loco & Vacuo.

#### THESIS I.

**L**ocus ab Aristotele definitur, superficies corporis continentis proxima & immobilis. *l. 4. Ph. c. 4. Conimb. ibid. quest. 1. Tol. quest. 3. & 4. Perer. lib. 11. cap. 6. & 7.*

2. Hac acceptione locus non est essentialis proprietas corporis naturalis. Quod enim corpus alio corpore circumscribatur, non oritur ex interna natura corporis, sed ex lege universalis naturæ, vacuum impediens.

3. Quin nec cælum in loco esse, dici rectè poterit, si locus sit *superficies corporis continentis*, quicquid contra disputent *Conimb. lib. 4. Phys. cap. 5. quest. 2. Tol. ib. quest. 7. Per. lib. 11. cap. 8. & 9.*

4. Præterea, loci immobilitatem non facile,  
nec

nec eodem modo tuentur, qui locum superficiem esse volunt. Aliter enim *Conimb. dict. lib. 1. quest. 1.* Aliter *Tol. ib. quest. 5.* Aliter *Perer. lib. 11. cap. 2. & 3.* Aliter alii loci immobilitatem interpretantur. Omnium optimè *Keck. lib. de loco & locato* locum immobilem esse docet respectu *βάρους*, quæ locato immobilis subternitur.

5. Quæ cum ita sint, videtur locus esse spatium in quo corpus est. *Scalig. exer. 6. sect. 3. Contrà Conimb. lib. 4. Phys. c. 5. quest. 1. Tol. ibid. quest. 3. Perer. lib. 11. cap. 5. & seq.*

6. Spatium non est corpus, nec quantitas, nec quidquam reale, sed imaginaria quædam capacitas æqualis locato.

7. Locus quantitatem sequitur: ideoque quàm necessarium est corpus esse quantum, & extensum; tam necessarium est, corpus esse in loco.

8. Et, dimensiones partesque loci, dimensionibus & partibus corporis locati respondere.

9. Duo corpora non possunt simul esse in eodem loco, ne divina quidem virtute; quemadmodum duæ partes ejusdem corporis non possunt esse in iisdem loci partibus. *Contrà Conimb. lib. 4. Phys. cap. 5. quest. 4. omnesque Pontificii.*

10. Non magis potest idem corpus simul esse

esse in diversis locis. *Contra eosdem ibid. quest. 5.*

11. Vacuum est spatium expers & capax corporis.

12. Dari vacuum in naturâ, perperam à veteribus assertum est. Quin nec dari potest naturaliter. *Conimb. lib. 4. Phys. c. 9. quest. 1. Tol. ibid. quest. 10.*

13. Natura tam studiose vacuum vitat, ut se tueatur. Res enim subcælestes virtute cæli subsistunt; quæ ad eas deferri non posset, interposito vacuo.

14. Hujus virtutis defectum cum possit Deus supplere, non videtur negandum, quin virtute Dei vacuum dari possit. *Conimb. l. 4. Phys. c. 9. quest. 9.*

15. Non demonstravit Aristoteles *lib. 4. Phys. cap. 8.* si aliquid natura sua moveretur in vacuo, illud motum iri in momento. *Conimb. ibid. quest. 5. Tol. ibid. quest. 9. Contrâ Pererius lib. 11. cap. 10. & 11.*

16. Quod igitur corpus sua natura non possit in vacuo moveri, non ex eo est, quòd motus ille foret momentaneus, sed quòd ad eum non posset conspirare virtus cæli.

## De Motu.

## T H E S I S I.

**M**otus est actus ejus, quod est potentia, quatenus est potentia. *Arist. lib. 3. Phys. cap. 2. Conimb. ibid. quaest. 1. Per. lib. 13. cap. 2. & seq.*

2. In motu considerari debet, movens, mobile, terminus à quo, & terminus ad quem.

3. Motus non est in movente, sed in mobili. *Conimb. lib. 3. Phys. cap. 3. quaest. 1. Tol. ibid. quaest. 2. Perer. lib. 13. cap. 7.*

4. Termini motus sunt oppositi. *Perer. lib. 13. cap. 9. quaest. 5.*

5. Abiectio tamen termini à quo, & acquisitio termini ad quem, non est, nisi unus motus. *Perer. ib. quaest. 7. Tol. l. 5. Ph. quaest. 4.*

6. Motus formaliter non est forma in fieri, sed via ad formam; nec tamen re ipsa à forma differt, sed ratione ac definitione. *Conimb. lib. 3. Phys. cap. 2. quaest. 3. Tol. ibid. quaest. 3. Perer. lib. 13. cap. 9. quaest. 10.*

7. Terminus ad quem debet esse divisibilis. *Perer. cit. loc. quaest. 4.*

8. Hinc sequitur, motum esse successivum & continuum. *Con. l. 3. Ph. c. 2. quaest. 2. Per. l. 14. c. 8.*

9. Uni-

9. Unitas & distinctio motus generica & specifica, petenda est ab unitate & distinctione termini ad quem. *Conimb. l. 5. Phys. cap. 4. quæst. 1. Tol. ibid. quæst. 2. Perer. lib. 13. c. 9. quæst. 8.*

10. Ergo motus tantum est in tribus categoriis; in quantitate, est augmentatio & diminutio; in qualitate, alteratio; in ubi, motus localis. *Conimb. lib. 5. Phys. cap. 2. quæst. 1. Perer. lib. 14. cap. 2.*

11. Generatio enim & corruptio non sunt species motus propriè dicti: sed mutationes momentaneæ. *Tol. lib. 5. Phys. quæst. 1. Perer. lib. 14. quæst. 1.*

12. Ad unitatem numericam motus, præter unitatem numericam termini ad quem, requiritur unitas mobilis, & continuïtas temporis. *Conimb. lib. 5. Phys. cap. 4. quæst. 5. Tol. ibid. quæst. 3.*

13. Motus localis dividitur in naturalem, & violentum. Naturalis motus proximè quidem à propria mobilis forma est, sic tamen, ut dici possit à generante esse, ut à principio remoto. *Conimb. l. 8. Phys. cap. 4. quæst. 1. Zab. lib. 1. de motu grav. & lev. cap. 1. & sequentibus.*

14. Motus naturalis vel rectus est, vel circularis. Motus rectus principio tardior est, in fine velocior. Hujus rei causâ esse existimo, quòd



quòd medium in principio magis, in fine minus resistit. *Perer. lib. 14. cap. 3. Zabbar. lib. citato cap. 13.*

15. Motus violentus à principio externo mobili imprimitur, vel præter, vel contra naturam mobilis. Estque vel pulsio, vel vectio, vel tractio, vel circumvolutio.

16. Motus projectorum est à virtute corporibus projectis à projiciente impressâ, quæ sit causa ministra illius motus, eo modo, quo gravitas & levitas est causa motus naturalis in elementis. *Scal. exerc. 28. sect. 1. Contrà Perer. lib. 14. cap. 4. Zabbar. lib. 1. de mot. grav. & lev. cap. 17.*

## DISPUTATIO VII.

## De tempore.

## T H E S I S I.

**T**Empus definitur ab Aristotele numerus motus secundum prius & posterius. *l. 4. Phys. cap. 11. Conimbr. ibid. cap. 14. quæst. 1. Tol. ibid. quæst. 13. Perer. lib. 12. cap. 2. & seq.*

2. Tempus definitur *numerus*, non quia motum facit numerabilem, aut partibus mensurabilem, (hoc enim habet motus sua natura) sed quia est mensura, qua partes  
B                      motus

motus numerantur ac mensurantur. *Contrà Tol. lib. 4. Phys. quæst. 13.*

3. Præterea definitur numerus *motus*: quia temporis fluxum sine motu aut partium successione non deprehendimus.

4. Res ergo permanentes, quæ non sunt positæ in continuo partium fluxu, sed totæ simul existunt, per se non mensurantur tēpore, sed ævo, & sic principio simul ac fine carent, ut Deus æternitate. *Perer. lib. 12. cap. 8. & seq.*

5. Si tamen tempus rebus permanentibus tribuitur, id fit ratione morus alicujus, cum quo illarum duratio comparatur. Idem de quiete judicandum est. *Perer. lib. 12. cap. 4.*

6. Tempus ergo non existit per se totum, neque etiam per suas partes, sed per indivisibile momentum, quo partes futuræ cum præteritis copulantur, quod Græcis *πρῶτον* vocatur. *Contrà Conimb. 4. Phys. cap. 14. quæst. 1. art. 4.*

7. Mensura & mensuratum debent esse in eodem genere. Quare, cū per se nihil mensureretur tempore, nisi motus, aut id, quod movetur; tempus etiam debet esse motus.

8. Jam verò, mensura in unoquoque genere debet esse notissima, maximèque æqualis. Quocirca, cū motus primi mobilis sit omnium motuum notissimus, & maximè

me æquabilis, sequitur, rationem temporis primario convenire motui primi mobilis; secundario, reliquis motibus, qui adhiberi solent ad aliorum motuum durationem mensurandam. *Conimb. l. 4. Phys. c. 14. quæst. 1. art. 2. Perer. lib. 21. cap. 4.*

9. Tempus igitur materialiter idem est cum motu primi mobilis, aut quovis alio motu mensurante: diversum à motu mensurato. *Conimb. dict. loc. quæst. 2. Perer. lib. 12. cap. 1.*

10. Forma temporis est, esse mensuram. Ratio mensuræ pendet ab intellectu. Ex quo sequitur, tempus quoad rationem formalem, esse ens rationis, aut saltém tale, quod ab intellectu pender. *Conimb. dict. loc. quæst. 1. art. 2. Pere. lib. 12. cap. 3. Contrà Tol. lib. 4. Phys. quæst. 16.*

11. Tempus tantum unum est, quia una tantum est in unoquoque rerum genere mensura. *Tol. dict. l. quæst. 17. Perer. l. 12. c. 4.*

12. Tempus ab Aristotele definitum, non est propria corporis naturalis aut motûs affectio: non solum, quia ab intellectu pendet ratione formæ; sed maximè, quia potest à motu separari. Si enim, stante cœlo, reliqua moverentur, certè ea essent in tempore: attamen motus eorum, cœlesti motu non mensuraretur.

13. Itaque videtur tempus, quod quidem inter affectiones corporis naturalis numeratur, nihil aliud esse, quàm *mora motus*, aut *durationis successiva*.

14. Hæc mora non est ipse motus, nec vera aliqua res, sed duratio quædam imaginaria, quæ ita se habet ad durationem motûs, ut se habet spatium ad corpus locatum. *Conimb. l. 4. Phys. c. 14. quest. 1. art. 2.*

15. In uno discrimen est, quod singulis corporibus suum responder spatium, ita ut duo corpora non possint esse in eodem spatio: cùm omnibus rebus, quæ simul existunt, unum sit idemque tempus.

16. Ipsa igitur mora, aut imaginaria illa duratio rerum in motu, tempus est: cœli motus non tam est tempus ipsum, quàm temporis mensura.

## DISPUTATIO VIII.

### De Mundo.

#### T H E S I S I.

**A**ctum est de corpore naturali in genere; sequuntur species corporum. Atque hæ, vel omnes simul, vel singulæ seorsim considerandæ sunt.

2. Omnia corpora simul sumta, dicuntur  
*Mun-*

*Mundus*, sumta appellatione ab ornatu. Est enim mundus diversarum rerum *Ætæ* pulcherrimum quid, & perfectissimum. *Conimb. lib. 1. de cal. cap. 1. quæst. 1.*

3. Mundus est ordinata compages corporum naturalium, ab uno principio pendentium, & in unum finem tendentium.

4. Principium, sive efficiens causa, est Deus.

5. Deus mundum liberè condidit. *Conimb. lib. 8. Phys. cap. 2. quæst. 5. Perer. lib. 15. cap. 1.*

6. Deum mundum in tempore condidisse, non solum S. Scripturæ testimoniis, sed etiam ratione naturali demonstrari potest. *Contrà Conimb. dict. loc. quæst. 3. Piccol. lib. de mundo cap. 25.*

7. Mundus, nec ulla omnino creatura, potest esse ab æterno, sive permanens ea sit, sive fluens, ac successiva. *Tol. lib. 8. Phys. quæst. 2. Contrà Conimb. ibid. cap. 2. quæst. 6. Perer. lib. 15. cap. 13.*

8. Aristoteles agnoscit quidem Deum esse mundi causam. *Conimb. dict. loc. quæst. 2.* sed quæ agat ex necessitate naturæ. *Conimb. dict. loc. quæst. 5. Contrà Tolet. ibid. quæst. 3.*

9. Aristoteles conatus est mundi æternitatem demonstrare; idq; ita serio, ac constanter, ut dubitari non debeat, quin credi-

derit mundum ab æterno fuisse. *Lib. 8. Phys. lib. 1. de Cæl. lib. 12. Metaph.*

10. Argumenta Aristotelis aliorumque Peripateticorum pro æternitate mundi adducta, facile solvi possunt. *Conimb. lib. 8. Phys. cap. 2. quæst. 4. Tol. ibid. quæst. 1. Perer. lib. 15. cap. 1. & seq. usque ad cap. 10.*

11. Mundus non habet aliam formam præter ordinem partium, cum sit ex eorum numero, quæ dicuntur unum per aggregationem. *Piccol. de mundo cap. 3.*

12. Itaque mundus non est animatus, sive per animam mundi, Deus, sive aliud quidpiam intelligatur. *Piccol. dict. loc. cap. 28.*

13. Mundus quidem unus est, sed plures à Deo creari possunt; non tamen actu infiniti. *Conimb. l. 1. de Cæl. c. 9. quæst. 1. Piccol. de mundo cap. 8. & seq.*

14. Finis mundi proximus, est homo, aut verò hominis felicitas. Omnia enim, quæ in mundo sunt, in hunc finem conspirant, ut hominem ducant ad cognitionem creatoris; utque homo cognitum Deum debitâ reverentiâ & religione colat: quæ maxima hominis felicitas est.

15. Mundus naturâ suâ indissolubilis est, ideoque æternum est duraturus, continuato ordinario concursu Dei. Et licet subducto Dei concursu interiret, credibile tamen

men est, cum nunquam interiturum. *Conimb. lib. I. de Cœl. cap. 12. quest. 1.*

---

## DISPUTATIO IX.

## De Cœlo.

## T H E S I S I.

**C**ORPUS naturale, vel est cœlum, vel corpus subcœleste.

2. Cœlum non est substantia simplex, sed composita ex materiâ & formâ, sicuti reliqua corpora. *Conimb. l. I. de Cœl. c. 2. quest. 4. Contrà Zabar. lib. de nat. Cœl. cap. 2. & seq.*

3. Forma cœli diversâ est à formis elementorum. Ideoque cœlum non est elementaris naturæ, sed substantia quædam quinta, ab elementis specie distincta. *Conimb. dict. loc. quest. 5.*

4. Uttrum materia cœli sit eadem atque materia rerum subcœlestium, in utramque partem disputari potest. Aristoteles tamen videtur aliam cœlo, aliam subcœlestibus corporibus materiam tribuisse. *Conimb. dict. loc. quest. 6.*

5. Cœlum non habet qualitates activas, quibus est aliquid contrarium.

6. Ideoque, quamvis materia cœli sit capax omnium formarum, sicut materia re-

rum subcœlestium, cœlum tamen non est corruptibile: quia materia non est proxima causa corruptionis, sed contrariæ qualitatis. Materia enim nunquam amittit formam suam, nisi à contrario expellatur.

7. Cœlum est figurâ rotundâ, moveturque circa terram motu circulari, rapidissimo quidem, sed tamén constanti, maximeque æquabili. *Conimbr. lib. 2. de Cœl. cap. 4. quæst. 1.*

8. Cœlum non movetur ab intelligentiis, ut statuit *Arist. l. 8. Phys. cap. 6. lib. 12. Metaph. cap. 8.* omnesque Peripatetici, *Conimbricens. 2. de cœl. cap. 5. quæst. 5.* sed à propriâ formâ.

9. Cœlum agit in inferiora, idque motu, lumine, & occultis qualitatibus. *Conimb. l. 2. de cœl. cap. 3. quæst. 3. Contra Picus Mirand. lib. 3. cap. 5. & l. 6. contra Astrologos.*

10. Lux, & qualitates reliquæ, cœli motu dispensantur, & diversis mundi partibus per vices applicantur. Hinc dierum, & noctium, hinc tempestatum vicissitudines. *Conimb. lib. 2. de cœl. cap. 3. quæst. 3.*

11. Cessante cœlesti motu, non cessaret tamen actio cœli in inferiora, nec motus tolleretur à subcœlestibus. Sublata autem actione cœli in inferiora, tolleretur etiam actio corporum inferiorum. *Conimb. ibid.*

12. Cæ-



12. Cælum non accidentia solum, sed & substantias inanimes producit, ut elementa, meteora, lapides, metalla, & quidem ut causa principalis. *Conimbric. lib. 2. de cælo quest. 1. cap. 3.*

13. Imperfecta, & αὐτόματα animatorum genera, à cælo quidem produciuntur, non ut à causâ principali, sed ut à causâ minus principali, quæ sic se habet ad generationem imperfectorum animatorum, ut se habet semen ad generationem animatorum perfectorum. *Conimb. dict. cap. quest. 6.*

14. Ad generationem perfectorum animalium, cælum solummodò concurrit dispositivè. *Conimb. ibid. art. 3.*

15. Voluntas cœlesti actioni non subiacet, nisi indirectè, quatenus nempe voluntas sequitur corporis temperamentum. *Conimbr. ibid. quest. 8.*

16. Quæ à voluntate humanâ dependent, non possunt ex astrorum observatione prædici. *Conimb. ibid. quest. 9.*

17. Effecta naturalia, quæ infra Lunam sunt, probabiliter tantum prædicuntur; quæ supra Lunam sunt, certò. *Conimb. ibid.*

## DISPUTATIO X.

## De variis cœli Orbibus, &amp; Stellis.

## T H E S I S I.

**S**icuti varius est cœli motus, ita corpus cœleste variis orbibus distinctum est: quorum tamen supremus reliquos omnes sine resistantia secum circumducit. *Conimb. lib. 2. de cœl. c. 5. quest. 1.*

2. Philosophi octo distinctos orbes agnoverunt, septem nempe orbes Planetarum, & octavum stellarum fixarum. Horum enim omnium motus manifeste conspiciuntur diversi. Astronomi postea duos addiderunt. Quibus id fecerint indiciis, docet Clavius ad Sphæram Ioh. de Sacrobusco. *Con. dicto loco.*

3. Orbes cœlestes videntur specie diversi. *Conimb. dict. cap. quest. 3.*

4. Stella non est animatum quid; sed densior pars sui orbis. Hinc sequitur:

5. Stellæ moveri in suis orbibus. *Conimb. lib. 2. de cœl. cap. 8. quest. 1.*

6. Stellæ non distinguuntur specie à suis orbibus, sed tantum densitate. *Conim. dict. lib. cap. 7. quest. 7.*

7. Stellæ motu suo non efficiunt sonum. *Conimb. dict. lib. cap. 9. quest. 1.*

8. A densitate stellarum lux oritur. Corpus enim pellucidum, condensatione sui, fit lucidum.

9. Lux non est stellarum forma substantialis. *Conimb. lib. 2. de Cæl. cap. 7. quæst. 2.*

10. Lux omnium astrorum est ejusdem speciei. *Conimb. dicto loco, quæst. 3.*

11. Omnibus stellis inest aliquid nativæ lucis, aliis plus, aliis minus, prout sunt densiores, aut minus densæ: Lunæ omnium minimum, adeo ut non conspiciatur, nisi ea luce, quam à sole mutuatur. Et licet non appareat, reliquas stellas à Sole illuminari, credibile tamen videtur, aliquid illis lucis à sole accedere. *Conimb. citato loco, quæst. 4.*

12. Lumen, quod à luce in corpore pellucido generatur, non est corpus, sed qualitas. *Conimb. dict. loc. quæst. 2.*

13. Lux illuminando calorem generat, præsertim cum radii ab opaco corpore reflectuntur. *Conimb. ibid. quæst. 5. Zab. de cal. Cælest. cap. 10.*

14. Calor tanto major est, quanto directius lumen reflectitur.

15. Etiam motus causa caloris est. *Conimb. dict. loc. quæst. 6. Zab. de cal. cælest. cap. 3. & seq.*

## DISPUTATIO XI.

## De Generatione &amp; Corruptione.

## T H E S I S I.

**S**ic de cœlo; sequitur corpus subcœleste, quod, quia constat ex materiâ & formâ dissolubiliter unitis, variis generationum & corruptionum vicissitudinibus obnoxium est. *Con. l. 1. de gen. & cor. c. 4. quest. 8.*

2. Generatio est mutatio à non esse ad esse simpliciter. *Lib. 5. Phys. c. 1.* Vel, est mutatio totius, nullo manente subiecto sensibili eodem, hoc est, ejusdem speciei. *l. 1. de gen. & cor. c. 4.* Plenius sic; Generatio est mutatio à privatione substantiali ad formâ substantialem in materiâ. *Co. dict. loc. quest. 9.*

3. Generationis terminus adæquatus, est compositum: proximus & formalis, ipsa forma substantialis. *Co. dict. loc. quest. 15.*

4. Quia forma substantialis non intenditur aut remittitur, nihilque ei contrarium est; sequitur, generationem esse actionem momentaneam, totamque formam simul ac semel introduci. *Conimb. lib. 5. Phys. cap. 2. quest. 1.*

5. Generatio non consistit in productione formæ, sed in unionione formæ cum materiâ. *Conimb. l. 1. de gener. & corrupt. cap. 4. quest. 13.*

6. Ut

6. Ut ergo homo hominem generare rectè dici possit, non est necessarium, ut animam producat, sed ut materiam disponat, & animam cum præparatâ materiâ essentialiter uniat. *Conimb. ibid.*

7. Corruptio est mutatio compositi ab esse ad non esse simpliciter. *Lib. 1. de gen. & cor. cap. 4. Conimb. ibid. quest. 16.*

8. Generatio & corruptio sunt mutationes, non tam re, quàm ratione diversæ; atque hoc sensu dicitur, *Generatio unius, est corruptio alterius. Lib. 1. de gen. & cor. cap. 3. Zab. de gen. & int. cap. 5. & 6. Contrà Conimb. lib. 2. de gen. & cor. cap. 4. quest. 17. Tol. ibid. quest. 3.*

9. Hujus rei duæ causæ sunt: 1. quòd materia non possit esse sine formâ. 2. quòd duæ formæ specificæ non possint esse in eâdem materiâ. *Vide disp. 2.*

10. In corruptione nunquam datur resolutio usque ad materiam primam. Semper enim formæ quædam accidentales servantur in re genitâ, quæ fuerant in corruptâ, & vicissim. *Zab. de gen. & int. cap. 7. Tol. l. 1. de gen. & cor. quest. 7. Contrà Conimb. ib. cap. 4. quest. 10. Interdum etiam substantiales. Zab. dict. l. c. 3. Contrà Conimb. & Tol. locis citatis.*

11. Quicquid corrumpitur, à contrario corrumpi-

rumpitur: & quicquid generatur, à simili generatur. Itaque necesse est, ut alteratio generationem & corruptionem antecedit, quâ materia inepta redditur ad formam suam retinendam, & apta ad novam suscipiendam.

12. Alteratio est mutatio secundum qualitatem, eodem subjecto sensibili manente. *Lib. 1. de gen. & cor. cap. 4. Conimbric. ibid. quest. 1. Tol. ibid. quest. 5.*

13. Alteratio non fit per momenta quarundam distincta, sed productione qualitaris, quoad extensionem, tum quoad intensiorem, continuâ. *Conimb. dict. loc. quest. 2. Tol. ibid. quest. 6.*

14. Alteratio prævia, est actio re ipsa diversa à generatione subsequente: ita quidem, ut forma substantialis in materiâ non oriatur vi præcedentium dispositionum, sed opus sit novâ actione ad ipsam formam producendam. *Conimbr. dict. lib. quest. 12.*

15. Quicquid alteratur, alterari debet ab eo, quod ei dissimile est, vel quoad speciem, vel quoad gradum. *Conimb. dict. lib. cap. 9. quest. 2. Tol. ibid. quest. 13.*

16. Alteratio, quæ inter contrarias qualitates versatur, semper est reciproca, ita ut, quod alterat contrariû, vicissim à contrario, secundum eandem partem eandemque

contrarietatem, alteretur, si utrumq; consistat in debitâ distantia. Quod in ceteris mutationum generibus non contingit. *Conimb. dict. lib. quæst. 3. Tol. ib. quæst. 7. Zab. lib. de reactione.*

## DISPUTATIO XII.

## De Elementis in Genere.

## T H E S I S I.

**C**ORPUS subcœleste vel est elementum, vel mixtum ex elementis.

2. Elementum est corpus, in quod reliqua corpora resolvuntur; ipsum in alia, quæ specie differunt, resolvi non potest. *lib. 1. de cœl. cap. 3. Conimb. lib. 2. de gen. & cor. cap. 3. quæst. 1.*

3. Elementa, cum sint corpora, suas habent formas substantiales; verum quia nos latent, earum loco adhiberi solent qualitates ad elementa definienda & distinguenda. *Conimb. loco citato. Tol. ib. quæst. 1.*

4. Qualitates elementares vel primæ sunt, vel secundæ, sive ortæ à primis.

5. Qualitates primæ sunt, quæ nec ex aliis, nec ex se mutuo fiunt, sed ex quibus oriuntur ceteræ. Suntque numero quatuor, calor, frigus, humiditas, & siccitas. *Conimb. dict. loc. quæst. 2. Tol. ibid. quæst. 2.*

6. Ex

6. Ex his, calor & frigus dicuntur qualitates activæ, humiditas, & siccitas, dicuntur passivæ; non quòd non agant, sed quòd minùs agant, & in mistione habeant rationem materiæ. *Tolet. lib. 2. de gen. & cor. quest. 3. Zab. lib. 1. de qual. elem. cap. 5.*

7. Omnes qualitates primæ, sunt qualitates positivæ. *Conimb. l. 2. de gen. & cor. c. 3. quest. 1. Scal. exerc. 18. contra Cardanum.*

8. Caloris munus est, homogenea congregare, & heterogenea disgregare; frigoris, homogenea & heterogenea congregare; humiditatis, non facilè proprio, facile alieno, termino contineri; siccitatis, facilè proprio, non facilè alieno, termino contineri. *Conimb. dict. loc. quest. 3. Zab. de qual. elem. lib. 1. cap. 3. 4. & 7.*

9. Ex quatuor qualitatibus primis, duæ conveniunt singulis elementis, & quidem in gradu intensissimo. Naturalis enim qualitatum remissio, mistionem arguit. *Contarenus lib. 3. de elem. Contra Conimb. lib. 2. de gen. & cor. cap. 3. quest. 3. Tol. ibid. quest. 6. Zab. lib. 1. de qual. elem. cap. 1.*

10. Qualitates primæ, quatuor modis combinari possunt. Ex quo sequitur, esse quatuor elementa, ignem, aquam, aërem, & terram. *Conimb. lib. 3. de cœl. cap. 5. quest. 1. Tol. lib. 2. de gen. & cor. quest. 4.*

11. Ele-



11. Elementa, quæ alterâ qualitate conveniunt, vocantur symbolica; quæ neutrà, asymbola.

12. Qualitates primæ, sive sint symbolicæ, sive non, sunt ejusdem speciei infimæ, etiamsi conveniant subjectis specie distinctis. *Conimb. lib. 2. de gen. & cor. cap. 3. quæst. 6. & 7. Tol. ibid. quæst. 7. Zab. lib. 2. de qualit. elem. cap. 6.*

13. Elementũ quodlibet ex quolibet generari potest; facilius symbolicũ ex symbolico, quàm asymbolum ex asymbolo: quia facilius una, quàm duæ qualitates mutantur. *Co. dict. loc. c. 4. quæst. 3. Tol. ibid. quæst. 9.*

14. Ex duobus Elementis asymbolis, generatur elementum medium, & utrique symbolicum: ut ex aquâ & igni aër. *Conimb. dict. loc. quæst. 3. Tol. ibid. quæst. 10. Zab. lib. 2. de qualit. elem. cap. 8.*

15. Hinc sequi videtur, elementa asymbola non immediatè generari ex asymbolis. *Contrà Conimb. dict. loc. quæst. 1. Tol. ibid. quæst. 9.*

16. Qualitates secundæ ex multis hæ sunt præcipuæ; raritas, densitas, levitas, gravitas. Rarum dicitur, quod habet parum materiæ sub magnâ; densum, quod habet multum materiæ sub parvâ, quantitate: leve, quod sursum; grave, quod deorsum, movetur.

17. Ele-

17. Elementorum motus naturalis, finitus est: ideoque necesse est, elementa alibi naturaliter quiescere; gravia, ubi levia, aut minùs gravia, non subsident; levia, ubi gravia, aut minùs levia, non eminent.

18. Quum gravia levibus, aut minus gravibus incumbunt; & levia gravibus, aut etiam minùs levibus subsident, ubicunque sint, nituntur; illa, deorsum; hæc, sursum. *Conimb. lib. 4. de cœl. cap. 4. quæst. 2.*

## DISPUTATIO XIII.

### *De singulis Elementis.*

#### T H E S I S I.

**I**gnis est elementum calidum & siccum: ideoque summè rarum ac summè leve. *Conimb. lib. 4. de cœl. cap. 4. quæst. 1.*

2. Ignis in summo loco quiescit à motu recto. Moveretur autem à cœlo in orbem; sed præter, non contra naturam. Ideoque licet hic motus violentus sit, perpetuus tamen est, quia fit sine resistantiâ. *Zab. de motu ignis in orbem.*

3. Ignis in suo loco naturali nec indiget motu cœli ad sui conservationem, nec pabulo. Naturâ enim suâ perennis est, quia abest à contrario. *Contrâ Zab. de motu ignis in or-*

*in orbem.* Extra suum locum, & pabulo indiget, & circumfuso aëre, & loco, qui nec solis radiis sit nec libero aëri expositus.

*Conimb problem. ad libros de cœl. sect. 4.*

4. Aër est elementum humidum, & calidum: ideoque mediocriter rarum, ac mediocriter leve. *Conimb lib. 2. de gen. & cor. cap. 3. quest. 4. & Tol. ibid quest. 5.*

5. Aër tribus regionibus distinguitur: quarum infima pertingit ab aquæ & terræ superficie, usque quò radii solis reflectuntur; media, à reflexione radiorum ad summitates montium; summa inde ad orbem ignis.

6. Infima aëris regio æstate major est, hyeme minor; contrà media, æstate minor est, hyeme major: quia radii solares æstate rectius, ideoque altius, reflectuntur.

7. Calor naturalis medię regionis non impedit, quo minùs vapores peregrino calore & levitate sublatis, ad pristinum frigus ac gravitatem redeant. Humiditas enim caloris ac frigoris activitatem rerundit, sicuti siccitas acuit. *Zabar. de reg. aëris, cap. 7.*

8. Quod adeò verū est, ut vapores, recuperato naturali frigore, ipsū aëris calorem naturalem debilitent, ut media aëris regio præ ceteris videri possit frigida. *Zab. ibid.*

2. Aqua est elementum humidum & frigidū: ideoque mediocriter densum, ac medi-

diocriter grave. *Conimb. lib. 2. de gen. & cor. cap. 3. quæst. 4. & 5. Tol. ibid. quæst. 5.*

10. In mundi exordio, terrâ aliquâ sui parte extra naturalem locum constitutâ, aqua recepta fuit intra terræ cavitates, ut terra, quâ parte aquis exstaret, hospitium præberet animantibus.

11. Mare cum terrâ constituit unum globum, idemque est utriusque centrum. Itaque mare non est altius terrâ: hoc est, superficies maris non distat longius à centro terræ, quàm superficies ipsius terræ. *Conimb. lib. 2. de coel. cap. 14. quæst. 3. & 4. Clavius ad Sacroboscum.*

12. Maris falsedo à creatione est: conservatur à calore solis, tenuiores aquæ partes extrahentis, & crassas, atque adustas, in quibus falsedo hæret, relinquentis. *Conimb. de meteor. tract. 10. Scal. exer. 51.*

13. Mare varios habet motus, sed duos ceteris notiores: eorum alter est, quo mare fertur ab ortu in occasum. Hic motus haud dubiè est à motu primi mobilis. *Conimb. ibid. tract. 8. cap. 3.*

14. Alter motus est reciprocatio, quâ mare nunc ad littora fluit, nunc ab iis refluxit. Hic motus, etsi sequatur Lunæ motum, non tamen à solo Lunæ motu videtur dependere, sed etiam à causâ aliquâ occultiore.

tiore. *Conimb. dict. lib. c. 5. Contra Pictus Mirand. lib. 4. cap. 15. contra Astrolog.*

15. Fontes & flumina pleraque à mari oriuntur. *Conimb. ibid. tract. 9.*

16. Terra est elementum siccum & frigidum : ideoque densissimum, & gravissimum. *Conimb. lib. 2. de gener. & cor. cap. 3. quest. 4. & 5. Tol. ibid. quest. 5.*

17. Quum inclusus terræ cavernis spiritus, vel antiperistasi frigoris, vel motu accensus, materiam sulphuream, ac bituminosam invadit, efficit ignem subterraneum, qui maximâ sæpe violentiâ erumpit, ut fit in Vesuvio Italiæ, atque Ætnâ Siciliæ monte. *Conimbric. de meteor. tract. 12. cap. 2.*

## DISPUTATIO XIV.

### De Mistione & Temperamentis.

#### THESIS I.

**A**ctum est de elementis, sequitur corpus mistum, quod ex elementorum mistione generatur.

2. Mistio est miscibilium (id est, elementorum) alteratorum unitio. *Lib. 1. de gener. & cor. cap. 10. Conimb. ibid. quest. 2.*

3. Hæc unitio non consistit in appositione, aut confusione, sed in substantiali conjunctione.

junctione elementorum: quâ fit, ut ex quatuor diversis elementis fiat una substantia mixta. Ideoque nihil aliud est, quàm misti generatio. *Zabarel. l. 1. de misti gen. & int. cap. 19.*

4. Misti generatio definitur ab Aristotele, mutatio à qualitatibus activis, proportionem cum subjctâ materiâ (id est, cum qualitatibus passivis, humido & sicco) naturæ (id est, formæ generandæ) convenientem habentibus. *Lib. 4. meteor. cap. 1. Zab. citato loco, cap. 2.*

5. Quod aliter mistio, aliter misti generatio definiatur, id est ex diverso respectu. Mistio enim de elementis dicitur; generatio, de substantiâ genitâ. Elementa enim misceri, at substantia generari dicitur. *Zabar. dict. loc. cap. 9.*

6. Mistio ergo peragitur hunc in modum; Primum coguntur elementa in unum locum à cælo, idque justâ proportionem, ne unum elementum cætera in naturam suam convertat. Deinde in minimas particulas distracta, mutuâ actione & passione se invicem debilitant, & secundum omnes partes immutant. *Conimb. l. 1. de gen. & cor. c. 10. quæst. 1. Tol. ib. quæst. 19.*

7. In hac elementorum pugnâ, primum agit contrarium in contrarium, calidum in fri-

frigidum, & humidū in siccum: &, quia calor & frigus habent maximam activitatē, primò absolvitur harum qualitatū contemperatio, quā ex duabus qualitatibus extremis, fit una media, nēpe tēperatus calor.

8. Hic tēperatus calor agit deinde in siccum & humidum, ut in materiam, eaque sic regit ac terminat, ut inde mixti forma resultet, sub quā quatuor elementa ununtur essentialiter. *Zab. lib. 1. de gen. & int. misti, cap. 7.*

9. Ad formæ substantialis educationem, cœlum concurrit ut causa efficiens, remota quidem, sed principalis; calor elementaris, ut proxima, & instrumentalis: frigus ad misti generationem tantum concurrit per accidens. Calorem enim retundit solum; formæ substantialis educationem non attingit. *Conimb. l. 1. de gen. & cor. c. 3. quest. 1. Tol. ibid. quest. 19. Zab. cit. loc. cap. 4. & seq.*

10. In mixti corporis generatione, elementa pereunt: formæ tamen elementorum substantiales non penitus abolentur, nec etiam manent integræ in misto, sed refractæ. *Zabar. l. de missione. Contrà Conimb. cit. l. c. 10. quest. 3. Tol. ibid. quest. 17.*

11. Similiter & qualitates castigantur, & mutuâ actione & reactione remittuntur. *Conimb. dict. lib. quest. 4.*

12. Ha-

12. Harum qualitatū & formarum refractarum adminiculo, mistum resolvitur in elementa, idque eā proportionē, quā ex elementis coaluerat.

13. Atque hoc sensu dicuntur elementa in misto remanere virtualiter. Quamvis enim ipsa pereant, eorum tamen formæ substantiales, & qualitates castigatæ in misto manent.

14. Primarum qualitatū mixti formæ conveniens mistura, temperamentum appellatur.

15. Temperamentum ergo non est simplex aliqua qualitas, quatuor primis qualitatibus distincta, sed ipsæ primæ qualitates refractæ *Conimb. lib. 2. de gen. & corrup. cap. 8. quest. 1. Tol. ibid. quest. 18.*

16. Temperamentum aliud est uniforme; aliud difforme: illud *temperamentum ad pondus*, hoc *temperamentum ad justitiam* appellari solet.

17. Temperamentum uniforme dicitur, in quo omnes qualitates æquali graduum proportionē cōeunt.

18. Tale temperamentum in toto aliquo corpore inanimato ut dari fortè possit, in toto animato non potest: & si forte in aliquā viventis parte dari possit, non potest esse diuturnum. *Conimb. ibid. quest. 2.*

19. Tem-



19. Temperamentum difforme dicitur, in quo vel una aliqua, vel duæ qualitates, cæteras superant: illud, simplex; hoc, compositum vocatur.

20. Utrumque est quadruplex. Nam & in singulis qualitatibus potest esse excessus, & excedentes qualitates quatuor modis possunt combinari.

21. Si excedit calor & siccitas, erit temperamentum igneum; si calor & humiditas, æreum; si humiditas & frigus, aqueum; si frigus & siccitas, terreum. In animalibus vocantur, cholericum, sanguineum, phlegmaticum, & melancholicum.

## DISPUTATIO XV.

*De Putrefactione.*

## T H E S I S I.

**M** Istum tribus modis interit, putrefactione, combustione, & petrificatione. *Zab. l. 2. de misti gen. & inter. cap. 2.*

2. Putrefactio dicitur interitus misto naturalis; combustio & petrificatio, violentus: quia universalis naturæ lege constitutum est, ut mistum putredine intereat. *Zab. ib. cap. 3. & seq.*

3. Putrefactio est corruptio caloris proprii

C

ac

ac naturalis, in unoquoque humido, à calore ambientis. *Lib. 4. meteor. cap. 1. Zab. lib. 3. de misti gener. & inter. cap. 5.*

4. Frigus non concurrit ad putrefactionem, ut causa positiva, sed ut mera privatio caloris. *Zab. ibid. lib. 2. cap. 8.*

5. Calor naturalis corrumpi dicitur, quia ab ambiente calore intenditur, atque ita ex naturali ac temperato calore, fit calor non naturalis, atque intemperatus. *Zab. ibid. lib. 2. cap. 9.*

6. Calor naturalis, ubi ab ambiente calore actus est, sensim evaporat *in unoquoque humido*, siue naturale illud fuerit, siue adventitium: prius tamen in adventitio. *Zab. ibid. lib. 2. cap. 10.*

7. Calor ambiens debet esse debilis, & lentus: si enim intensus sit, & vehemens, vel urit, vel siccatur, & humidum resolvit, priusquam calor possit evaporare. *Zabarrell. ibid. lib. 3. cap. 5.*

8. Itaque quæ valde calida, aut valde frigida sunt, non facile putrescunt: putrescunt tamen, quia actio caloris ambientis, licet sit intensione debilis, est tamen extensione & perseverantiâ maxima & validissima. *Zabar. ibid.*

9. Cum naturalis calor evaporavit, diffuit humidum naturale, & siccas partes de-

destituit. In hac humidi & sicci separatione consistit misti interitus. *Zab. ib. l. 2. c. 6.*

10. Putrefactionis varii sunt gradus. Interdum enim omne humidum à sicco separatur: & tum res putrescens in elementa dissolvitur. Hæc vocatur putrefactio *totalis*.

11. In quibusdam major est humidi copia, quàm ut possit totaliter à sicco separari. Hæc dicuntur *secundum partem* putrescere. *Zab. ibid. lib. 2. cap. 14.*

12. Putrefactio secundum partem, locum habet in mistis liquidis: ut vino, lacte, sanguine: & in elementis, aëre, aqua & terra, impuris. Ignis non putrescit. *Zab. ibid.*

13. Mista liquida, quando *secundum partem* putrescunt, interdum vitiantur quoad solas qualitates; interdum ipsa etiam forma substantialis aboletur. Illa inchoata, hæc perfecta putredo est. Elementa, cum sint corpora simplicia, non possunt perfectè putrescere. *Zabar. ibidem cap. 15.*

14. Acetum non est vinum putrefactum, sed mortuum. *Zab. ibid. lib. 3. cap. 9.*

15. Combustio est totius misti à vehementi calore in ignem & cineres mutatio. Cineres enim sunt partes terræ quæ propter magnam vim resistendi, non potuerunt transmutari.

16. Putrificatio est totius mixti à vehementi frigore in terram mutatio.

## DISPUTATIO XVI.

## De Meteoris.

## T H E S I S I.

**C**Orpus mixtum, vel inchoatum est, vel perfectum. Inchoatum dicitur, in quo, vel non omnia elementa coëunt, vel aliqua elementi species actu remanet. Quale est exhalatio.

2. Exhalatio vel fumus est, vel vapor. Fumus, quia ex terrâ educitur, siccus est; vapor, quia ex aquâ, humidus: uterque calorem habet ab astris impressum; & raritatem, ac levitatem, caloris comites.

3. Exhalatio non differt specie à terrâ, aut aquâ; ideoque facile redit ad pristinam naturam. *Conimb. de meteor. tract. I. cap. I.*

4. Quando exhalatio formas quasdam accidentales, atque impressiones recipit, dicitur *meteorum*.

5. Impressiones aut veræ sunt, aut apparentes. Veræ, vel in fumo sunt, vel in vapore. Fumus alius pinguis est, alius aridus. Cum fumus pinguis, motu, calore, aut antiperistasi frigoris accenditur, dicitur *meteorum igneum*.

6. Inter ignea meteora primum locum tenet *cometa*, qui est maxima fumi pinguis ac viscosi

viscosi copia, in supremam aëris regionem vi siderum educta, ibique conglobata primum, arctéque compacta, deinde accensa, ac stellæ instar lucens. *Conimb. de meteor. tract. 3. Kek. lib. 6. Phys. cap. 5.*

7. Si qui cometæ in regione cœlesti, hoc est, supra lunam, compareant, ii non sunt meteora, sed corpora simplicia, quæ videntur fieri ex cœlesti substantiâ condensatâ.

8. Cometæ caudam habent à sole ferè aversam; vel quia, quâ parte solem aspiciunt, cometæ partes tenuiores, quæ caudam faciunt, solis calore absumuntur: vel quia radii solares per corpus cometę transcurrentes, refranguntur, ut caudam facere videantur. *Scal. exercit. 72.*

9. Cometæ non signatantum, sed & causæ sunt tempestatum, sterilitatis, pestis. bella, principum interitus, provinciarum mutationes, & id genus alia, quæ à voluntatis arbitrio pendent, nec à cometis fiunt, nec indicantur naturaliter. *Conimb. de meteor. tract. 3. cap. 5. Scal. exer. 72.*

10. Reliqua meteora ignea evanida sunt, quia habent fumū subtilem, ac parū viscosum. In supremâ aëris regione gignuntur, flâma, fax, trabs, ignis pyramidalis, scintillæ volâtes, capræ saltantes. In mediâ, stella cadēs, & titio. In infimâ, draco volans, ignis

fatuus, ignis lambens, Castor & Pollux, Helena. *Conimbricenses de meteor. tractat. 2. cap. 2.*

11. Ex fumo arido seu flatu, generantur meteora aërea, ventus, & terræmotus. Ventus generatur, cum flatus copiosi, siderum virtute in sublime efferuntur, & frigore mediæ regionis aëris repulsi, partitâ veluti contentione, in obliquum feruntur. *Conimb. de meteor. tract. 6.*

12. Terræmotus generatur, quum copiosi flatus terræ cavitatibus inclusi, exitum quærunt, & quâ erumpant, non inuenientes, in se revolvuntur, factoq; conflictu, terram concutiunt. *Conimb. ib. tract. 11. Keck. de terræmotu.*

13. Cum vapor colligitur, & condensatur, generantur meteora aquea, nubes & ros. Nubes est crassus vapor, in media aëris regione condensatus. *Conimb. ibid. tract. 7.*

14. Ex nube fit pluvia, grando, nebula & nix. Pluvia, cum nubes constringitur, & in aquâ soluta, guttatim decidit: Grando, cum guttæ inter cadendum congelantur: Nebula, cum aliqua pars nubis, quæ in aquam non potest cogi, inferiorem aërē occupat. Quamquam aliquando vapores, qui ob spissitudinem non possunt in mediam aëris regionem efferri, infimam nebulosam efficiunt.

ciunt. Cum nubes congelatur, antequam soluta est, nix generatur. *Conimb. ibid.*

15. Ros gignitur, cum subtilis vapor, qui à debili solis occidentis calore evocatus, ob defectum caloris non potest in altum subvehi, nocturno frigore condensatur in exiguas guttulas. Quæ, cum rigent, pruina dicuntur. *Conimb. ibid.*

16. Si cum tenui vapore, ex quo ros generatur, partes quædã terræ subtiles attollantur, & cū humido, debito modo misceantur, gignitur mel, aut manna. *Con. ib. c. 9. & 11.*

17. Quando fumus in crassâ ac densâ nube conclusus, motu, frigorisve antiperistasi, incalescit, atque attenuatur, majorem locum quærens, cum fragore ac coruscatione erumpit. Hic fragor tonitru; & coruscatio, fulmen dicitur. Interdum etiam comprimitur fumus rator intra nubes, earumque collisione accenditur. Hæc coruscatio dicitur fulgur. *Conimb. ibid. tract. 2.*

18. Meteora apparentia dicuntur, quæ oriuntur à lucis in nube aut vapore, refractione, aut reflexione: ut sunt iris, halo, parhelius, fovea, virgæ. Quorum ratio petenda est ex Opticis. *Conimb. ibid. tract. 4. & 5.*

19. Corpus perfectè mixtum est, in quo omnia elementa sic concurrunt, ut nullum eorum suam speciem retineat.

20. Corpus perfectè mixtū, vel est inanime, vel vivens. Corpus inanime, vel est minerale: ut, metallū, lapis, succus, &c. vel cadaver. sed harū rerū specialiores cognitionem Chymicis & Medicis relinquimus.

## DISPUTATIO XVII.

### *De Animâ, Vitâ, & Morte.*

#### T H E S I S I.

**C**ORPUS vivens dicitur, quod ex anima & corpore, varia organorum structura prædito, conflatum est.

2. Anima non est temperamentum, aut ullum alterius generis accidens, sed substantia. *Conimb. lib. 2. de anima, cap. 1. quest. 1. art. 3. & 4. Tol. ibid. quest. 1.*

3. Anima non est materia, nec corpus, sed forma, sive *ἐπέλεια*. Latini *actum* dicunt. *Conimb. ibid. art. 5.*

4. Anima non est actus assistens, sed informans, & vera viventis forma. *Conimb. ibid.*

5. Anima est actus primus corporis organici potentia vitam habentis. *Lib. 2. de anima, cap. 1. Conimb. ibid. quest. 1.*

6. Corpus, quod ab anima informatur, est materia prima, non solum accidentibus quibusdam, sed & substantiali forma, quæ ex mixtione oritur, disposita atque affecta.

*Zab.*



*Zab. de com. gen. & int. cap. 2. & seq. Contrà  
Conimb. l. 1. de gen. & cor. c. 4. quæst. 19. & 20.*

7. Hæc forma substantialis ex formis organicarum partium componitur. Ut enim partes organicæ temperamento, ita etiam formâ differre credibile est. *Contrà Conimb. dict. loc. quæst. 22.*

8. Conjunctionem animæ & corporis, sequitur vita, quæ nihil aliud est, quàm motio animati à se ad positionum differentias, ob mansionem animæ cum corpore.

9. Animæ & corporis conjunctio pendet ab humidi radicalis ac primigenii, & nativi caloris, debitâ proportionem.

10. Cor in perfectis animalibus est fons caloris, à quo spiritus vitales per arterias in totum corpus diffunduntur, qui calorem, à corde haustum, ad omnes partes devehunt, & calorem singulis partibus insitum instaurant.

11. Cor, ne suo ipsius calore suffocetur, indiget respiratione. Attracto enim à pulmonibus aëre, cor refrigeratur, eodemque rursus emisso, à fuliginibus liberatur.

12. Imperfecta animalia, quia carent sanguine, ac proinde frigidiora sunt, non respirant. Pisces sui refrigerandi causa aquam ore hauriunt, & per branchias emittunt. Amphibia respirant, sed raro, ob debilem calorem.

13. Vita vel longior est, vel brevior, prout animati temperamentum, vel melius est, vel deterius. Longævi sunt, in quibus calor natus blandus est ac benignus; & humidum radicale, aëreum. Contrà brevis vitæ sunt, in quibus calor igneus est, & humidum aquosum.

14. Vitæ longitudo vel brevitās etiam ab externis causis pendet, puta ab aëre ambiente, victu, venere, somno, vigilia, ejectione aut retentione excrementorum, animi perturbatione, aut tranquillitate, &c.

15. Nulla vita perpetuari potest naturaliter, quia humidum radicale assiduò à calore carpitur. Et licet partes humidi deperditæ, nutritionis beneficio restaurentur; necesse tamen est, humidum sensim vilescere, & calorem minui.

16. Mors est privatio vitæ ob animæ separationem à corpore. Hæc separatio tum fit, cum calor naturalis exstinguitur.

17. Mors alia naturalis est, alia violenta. Mors naturalis dicitur, cum humidum radicale sensim absumitur, & cum eo calor naturalis, ut fit in senibus: violenta, cum vel naturalis calor exstinguitur à contrario frigore, vel cum calor naturalis suffocatur, vel denique cum pars aliqua vitalis læditur.

DISPV.

## DISPUTATIO XVIII.

## De Animâ vegetativâ, ejusque affectionibus.

## T H E S I S I.

**A** Nimarum species tres sunt, vegetativa, sensitiva, & intellectiva, sive rationalis. *Conimb. lib. 2. de animâ, cap. 3. quest. 1. Tol. ib. quest. 6.*

2. In unoquoque composito tantum est una anima. In plantis vegetativa, in bestiis sensitiva, in homine intellectualis. Harum tamen posterior, priorem quamque eminenter ac virtualiter continet. *Conimb. lib. 1. de gen. & cor. cap. 4. quest. 21. Tol. lib. 2. de animâ, quest. 7. Contra Zabarell. de facult. anima cap. 5. & seq.*

3. Anima vegetativa & sensitiva, sunt formæ materiales: ideoque extensæ ac divisibiles, ad extensionem, & divisionem materiæ. *Conimb. lib. 2. de animâ, cap. 1. quest. 8. Tol. ibid. quest. 5.*

4. Anima vegetativa in plantis sola est, omnemque perfectiorem animam excludit. Atque istoc modo plantarum forma est.

5. Facultates, quæ à triplici anima fluunt, ad quinque genera possunt revocari, ad vim vegetandi, sentiendi, appetendi, locomovendi.

movendi, & intelligendi. Et quia sensus & appetitus semper conjunguntur, quatuor erunt diversa genera, aut gradus viventium. *Con. dist. l. c. 3. quest. 2. Tol. ib. quest. 6.*

6. Facultates diversarum animarum inter se, & ab animæ substantiâ, realiter differunt. *Conimb. ibid. cap. 3. quest. 4. Tolet. quest. 9. Zab. de facult. animæ, cap. 2.*

7. Facultates, quæ ab anima vegetativâ, & sensitivâ fluunt, ne locomotivâ quidem exceptâ, in composito animato, quæ ab anima intellectiva oriuntur, in sola animæ substantia resident. *Conimbr. ibid. cap. 3. quest. 3. Tol. quest. 9.*

8. Animæ vegetativæ tres sunt facultates, nutritrix, auctrix, & generatrix. Quarum duæ priores non tam re, quàm ratione, ac definitione differunt: tertia ab utraque re ipsa distinguitur. *Tol. ib. quest. 10. Contrâ Conimb. ibid. cap. 4. quest. 1.*

9. Tres hæ facultates versantur circa alimentum: nutritio & generatio, quatenus substantia est: augmentatio, quatenus quantum.

10. Alimentum debet viventi partim simile esse, partim dissimile. Ideoque purum clementum, non potest esse viventis alimentum. *Con. l. 1. de gen. & corr. c. 5. quest. 6. & 7. Tol. ibid. quest. 12.*

11. Nu-

11. Nutritio est alimenti præparati conversio in substantiam viventis, ad partium deperditarum instaurationem. Est ergo nutritio, quædam partium novarum generatio, aut potius aggeneratio. *Conimb. dict. lib. c. 5. quest. 11.*

12. Quemadmodum non materia solum viventis, sed & forma quotidie aliqua sui parte diffluit, si sit materialis: ita quoque necesse est, formam simul cum materia reparari. *Conimb. dict. loco, quest. 12. Tol. quest. 9. contrà Zab. l. de accret. cap. 15. & 16.*

13. Ideoque cum vivens dicitur idem numero, toto vitæ cursu permanere, id non de identitate totius, aut partium intelligendum est, sed de identitate, quæ fit secundum continuam partium successionem. *Conimbr. & Tol. dictis locis.*

14. Formæ immateriales, quales sunt animæ humanæ, nec perire possunt, nec reparari, nequidem ex parte: possunt tamen præparatum alimentum subire, ejusq; substantiam, viventi conjunctam, indivisibili sua entitate informare.

15. Quia alimentum est substantia corporea & quanta, non potest vivens nutriri, nisi eadem actione crescat. *Contrà Conimb. dict. loc. quest. 13. & Tol. ibid. quest. 8.*

16. Omne vivens nutriri debet; & quidem  
rota

tota vita. *Conimbr. dict. loc. quest. 9. & 10.* Non tamen tota vita crescit. *Conimb. dict. loc. quest. 14.* Quin etiam decrescit; tum nimirum, cum minus nutrimenti in viventis substantiam convertitur, quàm ante nutritionem perierat.

17. Quod augetur, augetur secundum omnes partes, & dimensiones, recepto alimento in corporis poris. Quod autem corpus vivens excrescat in longitudinem magis, quàm in latitudinem, in eo sequitur legem virtutis plasticæ. *Conimb. dict. loc. quest. 15. Tol. ibid. quest. 10.*

18. Alimentum non distribuitur in minima, ut vocant, naturalia, sed in partes divisibiles, quæ singulæ in singulis poris recipiuntur. Hæ partes non in momento, non etiam per momenta discreta, sed actione continua, in substantiam viventis convertuntur. *Con. dict. loc. qua. 16. Tol. ib. quest. 11.*

19. Generatio est productio animati ab animato interventu seminis. Ideoque est naturalissimum opus viventis. *Tol. lib. 2 de animâ, quest. 11.*

20. Semen in perfectis animalibus ab utroque quidem sexu suppeditatur: verum vis plastica in solo maris semine est. Ideoque; foeminæ concurrunt passivè tantum ad generationem. *Con. lib. 1. de gen. & cor. cap. 4. quest. 27.*

DISPV

## DISPUTATIO XIX.

De Animâ sentiente, & sensu in  
genere.

## T H E S I S I.

**S**ic de anima vegetativa: sequitur sensitiva, quâ animal sentit, appetit, & loco movetur.

2. Sensus, est facultas animalis, quâ objectum sensibile cognoscit. Ejus functio, vocatur *sensio*.

3. Ad sensationem quatuor requiruntur, *objectum, organon, species, & medium*.

4. Objectum sensus est singulare materiale; universalis, aut immaterialia sub sensum non cadunt.

5. Objectum sensus aliud est per se, aliud per accidens. Objectum per se dicitur, quod per se sensum movet. Estque vel commune vel proprium. Commune dicitur, quod pluribus; proprium, quod uno tantum sensu percipitur.

6. Objectum commune, etsi per se sensum afficiat, *Tol. 2. de animâ, quest. 15.* non tamen propriam sui speciem organo imprimit; sed sentitur in specie objecti proprii modificatâ. *Conimb. 2. de animâ, cap. 6. quest. 5. Tol. ibid. quest. 14.*

7. Ob-

7. Objectum commune est quintuplex, motus, quies, magnitudo, numerus, & figura. *Conimb. dict. loc. quæst. 4.*

8. Sensus hallucinatur facilius circa commune, quam circa proprium objectum. *Conimbricenses dict. loc. quæst. 6. Tolet. ibidem, quæst. 13.*

9. Objectum per accidens, dicitur, quod cum eo conjunctum est, quod per se sentitur.

10. Organon est pars animalis, in qua objectum percipitur.

11. Organon debet esse vacuum qualitate sensibili ejusdem speciei, & gradus.

12. Objectum agit in organon per species. *Conimbricenses. lib. 2. de animâ cap. 11. quæst. 3. Tolet. 3. de animâ, quæst. 2.* Imò non agit, nisi per speciem, quatenus sentitur. *Zabar. de sensu agente, cap. 4. Contrà Con. & Tolet. citato loco.*

13. Species qualibet sui parte integrum objectum repræsentant. *Tolet. lib. 2. de animâ, quæst. 34.*

14. Species ab objecto producuntur naturaliter. Itaque non est opus sensu agente. *Zabar. de sensu agente, cap. 5.*

15. Objectum vehemens lædit organon: non quatenus agit per species; sed quatenus præter speciem, producit aliquam qualitatem primam, aut motum localem

in



in organo. *Contrà Con. l. 2. de anima, cap. 12. quest. 1. & Tol. ibid. lib. 3. quest. 4.*

16. Objectum positum in organo, non sentitur. Ex quo sequitur, necessarium esse medium ad sentiendum, per quod species ab objecto fluentes, in omnem partem propagentur. *Contrà Conimbricenses lib. 2. de animâ cap. 11. quest. 3. & Tolet. ibidem lib. 3. quest. 2.*

17. Non objectum tantum, sed & sentiendi facultas, siue anima, concurrît active ad sentiendum. Ex quo sequitur, sensum non esse facultatem merè passivam. *Conimb. lib. 2. de animâ, cap. 6. quest. 1. Tol. ib. quest. 12. Zab. de sensu agente, cap. 9.*

## DISPUTATIO XX.

## De Visu.

## T H E S I S I.

**S**ensus alius externus est, alius internus.  
 2. Sensus externus non percipit nisi res præsentés. Species enim (sine quibus non fit sensio) sublato objecto tolluntur, quia pendent ab illius actuali influxu. *Con. lib. 2. de animâ, cap. 6. quest. 2. art. 3.*

3. Sensus externus non sentit se sentire. *Conimb. ibid. q. 2. Tolet. quest. 3.*

4. Sensus

4. Sensus externi sunt quinque: visus, auditus, odoratus, gustus, & tactus. *Conimbr. lib. 3. de animâ cap. 1. quest. 1. Tol. ibid. quest. 1. Contrà Scalig. exer. 286. sect. 3.*

5. Visus est sensus externus eorum, quæ vim habent radiandi. Qualia sunt lux, color, & ea quæ noctu lucent.

6. Lux oritur ex terminatione solius perspicui: color, ex terminatione perspicui, cum admixtione opaci. Prout enim plus aut minus opaci perspicuo admiscetur, eo magis, aut minùs color à lucis naturâ recedit, & ad tenebras, seu nigrorem vergit.

7. Terminari dicitur perspicuum, quando condensatur. Perspicuum enim interminatum si sit, ac tenue, transaret: si condensetur, fit conspicuum, ac terminat visum. *Zabar. lib. 1. de visu, cap. 2.*

8. Corpora perspicua sunt cœlum, ignis, aër, aqua: sola terra inter corpora simplicia opaca est. Cœlum condensatum lucet luce purissimâ, ut in astris videre est. *Zabarella. ibidem.*

9. Elementa condensari nequeunt sine terrestri materia. Terra cum perspicuis elementis vel componitur tantum, vel etiam commiscetur. Si terra cum iis tantum componatur, sic ut perspicua naturam suam non amittant; ignis condensatus lu-  
cet,

cet, sed luce impuriore, ut in flammâ. Aër & aqua, si condensentur, albescunt. Ipsa terra nigra est. *Zabar. ibid.*

10. Si terra cum perspicuis elementis sic commiscetur, ut illa naturam suam perdant; & ignis splendor amittitur, & aëris atq; aquæ albor remittitur: idque vel magis, vel minus, prout plus terræ iis admixtum est. *Zabar. ibidem.*

11. Quod si terra elementa perspicua superet, nigror inde fit: vel intensior, vel remissior, prout terra magis, minusve prædominatur. *Zabarell. ibidem.* Colores medii oriuntur ex iusta temperatione extremorum. *Zabarell. ibidem.*

12. Hujusmodi colores appellantur veri, ac reales; quia constantes sunt, pendentque ab ipsa natura corporis colorati, non ab influxu, aut irradiatione externæ lucis. *Zabarell. ibidem.*

13. Ex quo sequitur, colores non solum esse in extima corporum superficie; sed per omnes partes, etiam intimas, diffusos: licet in superficie tantum videantur. *Conimb. lib. 2. de animâ cap. 7. quæst. 2. Tol. ibid. quæst. 17. Zabar. dict. loco.*

14. Colores apparentes dicuntur, qui oriuntur ex mixtione specierum in medio. Cum enim species lucis, & colorum, vel  
etiam

etiam diverſorum colorum ſpecies inter ſe, in medio commiſcentur, & per eandem lineam ad oculos deferuntur, talem colorem referunt, qualis oriretur ex verâ mixtione coloris cum luce, aut eorum colorum inter ſe, à quibus iſtæ ſpecies fluxerunt. *Zab. diſt. loco.*

15. Lux & color ad viſum deferuntur per medium perſpicuum illuminatum. Quam ob cauſam dicitur lumen *actus perſpicui, quatenus perſpicuum.* *Zabarella diſt. l. cap. 5.*

16. Lux per ſe viſibilis eſt: color non niſi lucis, aut luminis beneficio. Lumen ad viſionem requiritur, tum propter colores, tum propter medium, *Conimb. l. 1. 2. de animâ, c. 7. quaſt. 4. Zabarella diſt. libr. cap. 11.*

17. Organon viſus eſt oculus aut humor oculi medius, qui cryſtallinus appellatur. Fit ergo viſus receptione ſpecierum, non emissionem radiorum. *Conimb. diſt. l. quaſt. 5. 6. & 7. Tol. ibid. quaſt. 17. Zab. lib. 2. de viſu, cap. 8. & lib. 2.*

18. Viſio directa fit per lineas rectas, quæ à qualibet objecti parte in centrum oculi incidentes, figuram faciunt conicam. Hinc petenda cauſa eſt, cur res non appareant geminæ in oculis geminis: tum etiam, cur appareant geminæ, altero oculo diſtorto.

## DISPUTATIO XXI.

## De Auditu, Odoratu, Gustu, &amp; Tactu.

## T H E S I S I.

**A**uditus est sensus externus circa sonum.

2. Sonus oritur ex fractione aëris, aut etiam aquæ, inter duo corpora collisæ. *Conimb. lib. 2. de animâ, cap. 8. quest. 1. Tol. ibid. quest. 19.*

3. Corporum collidentium soliditas, levitas, & cavitas, non sunt necessaria ad faciendum sonum simpliciter; sed ad faciendum sonum vehementem, & prolixum. *Conimbric. ibidem.*

4. Sonus non est in corpore sonante; sed in medio aëre, vel aquâ, quæ à sonante corpore frangitur. *Conimb. dict. loc. 2. 4. Tol. ibid. quest. 20.*

5. Sonus ad aurem defertur secundum esse intentionale, sive per species; non secundum esse reale. *Tol. dict. lib. quest. 21. Contrà Conimb. dict. lib. quest. 2. art. 2.*

6. Species soni materialiores sunt, quam species colorum aut lucis; ideoque tardius ad organon perveniunt, & adverso vento impediuntur.

7. Cum species soni in corpus cavum incidentes

cidentes resiliunt, echo auditur. Echo ergo non est novus sonus, sed idem sonus iterum auditus. *Tol. dict. lib. quest. 22.*

8. Et si ad audiendum sit necessarius aër innatus, qui in interiore aure continetur, & ab externo aëre tenui membrana, quæ tympanum dicitur, discernitur: tamen is non est organon auditus, sed pars aliqua interior auriculæ animata, cum quâ nervus auditorius conjungitur. *Conimb. dict. lib. cap. 8 quest. 4.*

9. Odoratus est sensus externus circa odorem.

10. Odor oritur ex sicci terrei prædominantis, & humidi aërei decoëtorum mixture. *Conimb. dict. lib. cap. 9. quest. 2. Tolet. quest. 25.*

11. Organon odoratus sunt carunculæ, sive processus mammillares, in superiore narium parte siti. Hæ carunculæ, quia membrana aut, ut, volunt anatomici, ipsâ narium carne tectæ sunt, odores non percipiunt, nisi inspiratione. In piscibus tamen, aliisque animalibus, quæ non respirant, credibile est, organon odoratus tectum non esse. *Con. dict. loc. quæ 4. Tol. ibid. quest. 26.*

12. Medium, per quod odor ad organon diffunditur, est aër & aqua. *Conimb. dict. loc. quest. 3. art. 2.*

13. Odor

13. Odor per medium propagatur secundum esse intentionale, hoc est, per species. Quod si ipse odor interdum propagetur, id fit per accidens, cum scilicet tenuis substantia à re odoriferâ, & in eâ odor, evaporat. *Conimb. dict. loc. art. 1. Tol. ib. quest. 28.*

14. Odorum differentiæ non possunt explicari, nisi per analogiam cum saporibus; quia homo habet odoratum obtusorem, quàm ullum aliud genus animalium. *Conimb. dict. loc. quest. 5. Tol. quest. 25.*

15. Gustus est sensus exteruus circa saporem.

16. Sapor oritur ex humidi aquei prædominantis, & sicci terrei decoctorum mixture. *Conimbricens. dict. lib. cap. 10. quest. 1. Tol. quest. 29.*

17. Etsi gustus non sit sine tactu, ideoque non requirat medium externum: à tactu tamen reverâ distinguitur. *Conimb. dict. loco quest. 2. Tol. quest. 28.*

18. Organon gustus sunt nervi linguæ, qui ab ejus medietate in quosdam velut ramos expanduntur. *Conimb. ibid.*

19. Tactus est sensus externus circa qualitates tactiles.

20. Qualitates tactiles sunt calor, frigus, humiditas, siccitas, & quæ ex hisce oriuntur.

21. Or-

21. Organon tactus sunt nervi, ac membranæ; omnisque nervosa ac membranaea substantia, ut muscoli, lamenta, &c. Ossâ, non habent tactum ob terrestrem siccitatem. *Conimbricens. dict. lib. cap. 11. quæst. 1. Tolet. quæst. 30.*

22. Tactus non habet medium externum; medium internum probabile est esse cuticulam. *Conimbricenses dicto loco. Tolet. ibidem, quæst. 31.*

23. Tactus tantum unus est. *Conimbricenses dict. loc. quæst. 2. Tolet. quæst. 32. Contrâ Scalig.*

## DISPUTATIO XXII.

### *De Sensu interno, ejusque affectionibus.*

#### T H E S I S I.

**P**Ræter sensum externum, requiritur in animali sensus internus, qui externorum sensuum functiones, & objecta, etiam absentia, percipiat.

2. Sensus internus residet in cerebro. *Conimbr. lib. 3. de animâ, cap. 2. quæst. 2. Tol. ib. quæst. 5.*

3. Sensus internus tantum una facultas est.  
*Contrâ*



*Contrà Conimbr. dict. lib. cap. 3. quæst. 1. & Tol. quæst. 6.*

4. Sed quæ varias edit operationes ; ob quas variis nominibus appellatur , *sensus communis* , *phantasia* , *æstiativa* , sive *cogitativa* , *memoria* .

5. Sensus communis appellatur , quatenus species ab externis sensibus oblatas (vulgo species sensatæ vocantur) eorumque functiones percipit, ac dignoscit.

6. Phantasia, quatenus species sensatas variis modis componit ac dividit.

7. Æstiativa (in homine, cogitativa) quatenus ex speciebus sensatis elicit species non sensatas.

8. Memoria, quatenus species sensatas, & non sensatas conservat.

9. Internus sensus non ratiocinatur, ne quidem in homine, nisi concurrente intellectu. *Toletus dict. loc. quæst. 7. Contrà Conimbricenses libr. 3. de animâ capit. 2. quæst. 2.*

10. Sensus interni operationes credibile est in distinctis cerebri ventriculis exerceri: ut dici possit, sensum communem in anteriore; phantasiam cum æstiativâ, in mediâ; memoriam, in posteriore parte, quæ cerebellum vocatur, residere. *Conimb. dict. loc. quæst. 1. Tol. quæst. 6.*

D

II. Sen-

11. Sensuum affectiones sunt, vigilia, somnus & somnia.

12. Vigilia est non impeditum omnium sensuum externorum exercitium, animâ spiritus animales ad organa sensuum immitte.

13. Somnus est cessatio externorum sensuum ab operationibus, vaporibus nervos & meatus sensorios opplentibus, & spirituum animalium influxum impredientibus. *Conimb. de somno & vig. 2.*

14. Cum discussis, vel à calore cerebri, vel ab externâ causâ vaporibus, meatus sensorii, per quos spiritus animales transmeant, aperiuntur, animal expurgiscitur. *Conimbr. ibid. cap. 6.*

15. Somnium est apparitio, quæ fit in iis, qui somno sopiti sunt, ex regressu specierum à phantasiâ compositarum, aut divisarum, ex memoriâ ad sensum communem.

16. Somnia vel à supernaturali causâ, puta Deo aut Dæmone immittuntur; vel ex affectione corporis oriuntur; vel denique sequuntur studia quotidiana: illa dici solent supernaturalia; ista, naturalia; hæc, animalia. *Conimb. de insomniis.*

## DISPUTATIO XXIII,

## De Appetitu sensitivo &amp; locomotivâ.

## T H E S I S I.

**S**ic de sensu. sequitur appetitus sensitivus; qui tam necessariò cum sensu conjungitur, ut inutilis sit sensus, si sit sine appetitu.

2. Appetitus sensitivus est facultas animalis, quâ, quod sibi adversum aut conveniens sensus judicat, refugit, aut prosequitur. *Conimb. lib. 3. de animâ cap. 13. quest. 5. Tol. ibid. quest. 26.*

3. Appetitus sensitivus versatur solummodo circa bonum jucundum & utile, & malum utrique oppositum: bonum honestum, & turpe, quod illi opponitur, non spectat ad appetitum sensitivum.

4. Appetitus sensitivus est potentia materialis; ideoque per se expers rationis, ac libertatis: ita tamen, ut in homine ratione possit dirigi.

5. Appetitus sensitivus in corde residet. Cor enim afficitur appetitu sensitivo vehementius moto.

6. Appetitus sensitivus dividitur in ἐπιθυμητικὸν & θυμητικὸν, hoc est, in concupiscentem, & irascentem.

D 2

7. Ap-

7. Appetitus concupiscens dicitur, qui versatur circa obiectum absolute simpliciterque spectatum.

8. Concupiscens, qui versatur circa bonum aut malum difficile. *Contrà Piccol. phil. mor. grad. 1. cap. 11. & seq.*

9. Appetitus sensitivi propriæ affectiones, sunt affectus sive perturbationes. Græcè πάθη dicuntur. Affectus ergo non sunt opinionones (ut voluerunt Stoici) sed ex opinione fere nascuntur.

10. Affectus est motus appetitus sensitivi, cum non naturali mutatione cordis, ab objecto convenienti aut adverso à sensu proposito, ad illud consequendum, hoc fugiendum. *Piccol. ibid. cap. 5.*

11. Affectus præcipui sunt undecim : sex in appetitu concupiscente; nimirum amor, odium, desiderium, fuga, lætitia & tristitia: in appetitu irascente quinque; nempe, spes, metus, audacia, desperatio, & ira.

12. Stoici referunt omnes affectus ad quatuor genera: quorum duo versentur circa obiectum bonum, & duo circa malum. Circa obiectum bonum, si præsens sit, versatur lætitia; si sit futurum, desiderium: circa malum præsens, versatur tristitia; circa futurum, fuga. Horum duo fontes sunt amor & odium. *Vid. cap. 8. Idea Phil. mor.*

13. Cum

13. Cum appetitu sensitivo fere conjuncta est locomotiva, hoc est, facultas, quâ animal ad imperium appetitus sese movet ad consequendum objectum distans, aut fugiendum imminens.

14. Hæc facultas residet in singulis membrorum musculis. *Conimbr. lib 3. de animâ, cap. 13. quæst. 5. Tolet. ibid. quæst. 25.*

15. Ad motum localem concurrit sensus, (in homine etiam ratio) ut principium dirigens; appetitus, ut principium imperans; vis locomotiva, ut principium exequens.

16. Quia quædam animalia solo tractu vigent, & objecta distantia non percipiunt, sequitur, vim locomotivam iis non inesse; quia inesset frustra.

## DISPUTATIO XXIV.

### *De Anima intellectiva essentiâ & origine.*

#### THESIS I.

**S**ic de animâ sensitivâ : sequitur intellectiva, sive rationalis. Cujus consideranda est essentia, & proprietates.

2. Anima intellectiva non est forma quædam assistens in homine, quæ corpore utitur tanquã instrumento; sed ipsa hominis

D 3                      forma

forma informans, per quam nimirum homo est homo, & à brutis distinguitur. *Conimbricenses lib. 1. de animâ cap. 1. quaest. 6. Toletus ibidem quaest. 2. Zabarell. de mente humanâ cap. 6.*

3. Hinc sequitur, animam intellectivam non esse in aliquâ hominis parte, puta corde aut cerebro; sed in toto corpore, & per totum corpus diffusam, non solum quoad facultates, sed etiam quoad essentiam. *Conimbricenses dicto loco quaest. 9. Toletus ibidem quaest. 4.*

4. Anima intellectiva non est una in omnibus hominibus, sed singulae sunt animae in singulis: multiplicantur enim formae ad numerum individuorum. *Conimbricenses dict. loc. quaest. 7. Toletus ibid. quaest. 2. Zab. dict. lib. cap. 11.*

5. Præter animam informantem, non est fingenda alia quædam anima assistens, quæ una sit in omnibus hominibus, *Con. & Tol. dictis locis.*

6. Anima intellectiva est forma immaterialis, hoc est, forma talis, quæ per se, ac sine concursu materiæ possit subsistere. *Conimb. dict. loc. quaest. 2.*

7. Animæ intellectivæ non sunt ex tra-  
duce: hoc est, non producuntur vi seminis,  
sive, quod idem est, non educuntur ex po-  
ten-

tentia materiæ, sed immediatè à Deo creantur. *Conimb. dict. loc. quæst. 3. Tolet. ibid. quæst. 17.*

8. Creantur animæ eo momento, quo corpori infunduntur, eique essentialiter uniuntur. Atque illud est, quod vulgò dicitur, Deus animas creando infundit, & infundendo creat. *Tolet. ibid.*

9. Infunditur autem anima; cùm embryo convenienti organorum apparatu instructus est. Interea credendum est: embryonem foveri ab insitâ virtute plasticâ, & ab animâ matris, ac calore uteri, aut loci, qui pro utero est.

10. Supervacuum ergo est fingere animam vegetativam, & sensitivam, quæ animam rationalem antecedant, quæque in animam rationalem de inde mutantur, vel animâ rationali adveniente pereant. *Contrà Conimbric. dict. loc. quæst. 4.*

11. Anima intellectiva est indivisibilis: ideoque tota, hoc est, indivisibili modo, in qualibet parte. *Conimbr. dict. loc. quæst. 8. & 9. Tolet. ibid. quæst. 5.*

12. Animam intellectivam immortalem esse, non solum S. Scripturæ autoritate, sed etiam philosophicis rationibus probari potest. *Conimb. de animâ separatâ disp. 1. Tolet. lib. 3. de animâ quæst. 16.*

13. Animæ humanæ ratione essentiæ in omnibus æq; sunt perfectæ; differunt solum operandi modo. Quod discrimen fuit ab inæquali perfectione temperamentis, aut à contractâ agendi consuetudine. *Conimbr. lib. 2. de animâ cap. 1. quæst. 5. Tolet. libr. 3. quæst. 18.*

---

## DISPUTATIO XXV.

### De Intellectu.

#### T H E S I S I.

**S**ic de animæ intellectivæ essentiâ : sequuntur proprietates, intellectus, & voluntas.

2. Intellectus ex se est mera potentia in genere rerum intelligibilium, & veluti tabula rasa. *Conimbr. lib. 3. de animâ cap. 8. quæst. 1. art. 3.*

3. Cognitio intellectus derivatur à sensibus, ita ut nihil sit in intellectu, quod non fuerit prius in sensu.

4. Latius tamen patet objectum intellectus, quam sensus. Nam sensus versatur tantum circa materialia & singularia; intellectus, etiam circa immaterialia & universalia.

5. Singularia prius cognoscuntur ab intellectu.



tellektu, quàm universalia. Quia universalia cognosci nequeunt, nisi cognitis primùm singularibus. *Conimbr. lib. 1. Phys. cap. 1. quæst. 4. Tolet. lib. 3. de anima quæst. 16. Zabbar. de ord. intell. cap. 4.*

6. Ex quo sequitur, intellectum formare proprios rerum singularium conceptus. *Conimbr. lib. 3. de animâ, cap. 8. quæst. 5. Tolet. ibid. quæst. 26.*

7. Ex universalibus ea prius intelliguntur, quæ singularibus sunt viciniora; quia horum facilius est abstractio. *Conimbr. lib. 1. Phys. cap. 1. quæst. 3. Tolet. ibidem quæst. 3. Contra Zabbar. de ord. intell. cap. 12.*

8. Ad intellectionem non sufficit, phantasmata, id est, species rerum singularium in sensu interno formatas, intellectui obijci; sed requiritur præterea, ut species intelligibiles intellectui imprimantur, non solum universalium, sed etiam singularium. *Conimbricenses lib. 3. de animâ cap. 5. quæst. 3. & 4. Tolet. ibidem quæst. 21. Zabarell. de spec. intellect. cap. 5.*

9. Species intelligibiles rerum singularium imprimuntur intellectui à phantasmatis, eo ferè modo, quo phantasmata imprimuntur sensui interno ab iis speciebus, quæ in externis sensibus formatæ sunt ab objectis.

10. Species rerum universalium ipse intellectus sibi format per abstractionem, comparatis inter se primùm singularibus.

11. Non ergo videtur necessarium, fingere intellectum agentem, cujus munus sit, non intelligere quidem, sed phantasmata illustrare, ut in iis appareant naturæ universales, & cum phantasmatibus illustratis concurrere, ad species intelligibiles producendas: sive fingatur substantia, quæ sit ab animâ separata, sive facultas, quæ revera diversa sit ab eo intellectu, qui species intelligibiles recipit, & per eas intelligit. *Contrâ Conimbric. lib. 3. de animâ cap. 5. quæst. 1. 2. 5. & 6. Tolet. ibidem quæst. 13. & 14. Zabarell. de mente agente.*

12. Potest tamen intellectus, agens dici, quatenus recepta specie, actu intelligit, & conceptum, sive verbum mentis in se format. *Tolet. dict. lib. quæst. 22.* Nec aliud sequi videtur ex argumento Aristotelis *lib. 3. de animâ cap. 5.* Non enim absurdum est, agens & patiens reipsâ non distingui, in actione immanente.

13. Intellectus omnia intelligit directe, se ipsum indirectè, atque actu quodam reflexo; sic, ut ex objecto actiones suas, ex actionibus se ipsum agnoscat. *Conimb. lib. 3. de animâ, cap. 8. quæst. 7.*

14. In-

14. Intellectus impressas sibi species conservat atque hoc sensu dicitur memoria intellectualis. *Conimb. de mem. & reminisc. c. 3. Tolet. lib. 3. de animâ quæst. 21.*

15. Cum intellectus speciebus intelligibilibus consignatus, ad intelligendum iteratò sese accingit, phantasmatum concursus necessarius est ad intelligendum. Atque hoc voluit Aristoteles, cum dixit, oportet intelligentem speculari phantasmata. *Lib. 3. de animâ. cap. 8. Conimbr. ibid. quæst. 8. Tol. quæst. 21.*

16. Intellectus operationes sunt tres: simplicium rerum apprehensio, iudicium, quod consistit in compositione ac divisione, & discursus.

17. Iudicium intellectus vel est speculativum, vel practicum: quorum illud versatur circa res, ut res sunt; hoc, circa res, ut bonæ vel malæ; ideoque vel appetendæ, vel fugiendæ sunt.

18. Intellectus proprium est reminisci. Est autem reminiscentia, speciei obliterate renovatio, per specierum non oblitteratarum rememorationem. *Conimb. de mem. & reminisc. cap. 7.*

## DISPUTATIO XXVI.

## De Voluntate.

## T H E S I S I.

**S**icuti cum sensu conjungitur appetitus sensitivus, ita cum intellectu conjungitur appetitus intellectualis, qui voluntas dicitur.

2. Voluntas realiter differt ab appetitu sensitivo. *Conimb. lib. 3. de animâ cap. 13. quæst. 1. Tolet. ibid. quæst. 27.* Imo etiam ab intellectu. *Conimb. dict. lib. quæst. 3.*

3. Voluntatis actiones duæ sunt, βέλησις & ἀεγούρισις: illa finis; hæc, mediorum est.

4. Voluntas non est potentia merè passiva, nec merè activa. Itaque non potest se ad agendum determinare, nisi moveatur ab objecto.

5. Cum autem voluntas sit potentia cæca, nihil potest appetere, nisi quod illi ab intellectu proponatur. Hinc vulgatum illud; *Ignoti nulla cupido.*

6. Non sufficit ad movendam voluntatem, ut intellectus objectum apprehendat: sed requiritur porro, ut illud censeat, sitne bonum, an malum. Hæc intellectus actio, vocatur iudicium sive dictamen practicū.

7. Practicum intellectus iudicium, vel absolutum est, vel comparatum. Absolutum di-

dicatur, quo censetur res in se, & per se: comparatum, quo res censetur comparata cum aliis omnibus rebus, ac circumstantiis.

8. Hoc duplex intellectus judicium sequitur duplex actio voluntatis: quarum altera, quæ sequitur judicium absolutum, *velleitas*; altera, quæ comparatum judicium sequitur, *volitio* appellari solet.

9. Utraque actio à prævio judicio intellectus determinatur, non solum quoad exercitium actus, sed etiam quoad specificationem. Et certè si à judicio practico voluntas posset dissentire, & aliud, vel etiam contrarium appetere, ferretur in incognitum objectum, & sine ratione moveretur, & sic non esset voluntas.

10. Hæc voluntatis determinatio non evertit hominis in suis actionibus libertatem, sed stabilit.

11. Etenim libertas non est ἀδραφεια quædam, quâ voluntas potest agere, & non agere, hoc vel illud agere, etiam positis omnibus ad agendum requisitis; sed facultas hominis faciendi quod ratio dicitur.

12. Etenim voluntas fertur in finem, & quidem liberè, siquidem libertas non potest à voluntate separari: attamen à fine, quatenus

quatenus cognoscitur ut finis, determinatur.

13. Sunt autem duo actionum genera, quæ à voluntate proficiscuntur, aliæ proximè, aliæ remotè. Quarum illæ *elicitæ*, hæ *imperatæ* vocantur. Imperatæ actiones, nihil aliud sunt, quam eliciarum executio.

14. Libertas hominis exercetur in actionibus imperatis: actiones elicitæ sunt ipsum dominium, quo suam libertatem voluntas exercet in actiones imperatas. Ideo enim liberè ambulamus, quia volumus ambulare.

15. Pugna animi, quæ hac voce solet exprimi, *Video meliora proboque, Deteriora sequor*, non oritur ex eo, quod voluntas ab intellectus iudicio discrepet; sed ex pugna aut fluctuatione intellectus, rem absolute consideratam improbantis, eandemque cum suis circumstantiis collatam approbantis; aut contrà.

F I N I S.

T I T U -



T I T U L I

· E T

ORDO DISPUTATIONUM,  
quæ hac Ideâ continentur.

- I. **D**E Philosoph. & Physicæ naturâ.
- II. **D**E Principiis corporis naturalis.
- III. De naturâ.
- IV. De quantitate corporis naturalis.
- V. De Loco, & Vacuo.
- VI. De Motu.
- VII. De Tempore.
- VIII. De Mundo.
- IX. De Cælo.
- X. De variis cæli orbibus, & stellis.
- XI. De Generatione & corruptione.
- XII. De Elementis in Genere.
- XIII. De singulis elementis.
- XIV. De Mistione & temperamentis.
- XV. De Putrefactione.
- XVI. De Meteoris.
- XVII. De Animâ, vitâ & morte.
- XVIII. De Animâ vegetativâ, ejusque affectionibus.
- XIX. De

XIX. De *Animâ sensitivâ & sensu in genere.*

XX. De *Visu.*

XXI. De *Auditu, Odoratu, Gustu & Tactu.*

XXII. De *sensu interno, ejusque affectionibus.*

XXIII. De *Appetitu sensitivo, & Locomotivâ.*

XXIV. De *Anima intellectiva essentiâ & origine.*

XXV. De *Intellectu.*

XXVI. De *Voluntate.*

F I N I S.



A01 1454293